

霞

外

攬

屑

霞外攬屑卷二目錄

香雪庵筆書丙集

山陰 平步青 景孫 纂

辛夷垞叢言 格言

戒殺

勸學文

昏姻

姚端恪公

依外家法

試題出處宜告人

擬墨不可輕作

北朝造像不必學不可寫古字

兄弟合葬

居喪不作詩文

刻稟娶小

鬧房

不根之謗

晚昏

蘇文忠公

負心之報

李義山

讀書五失

霞外攬屑卷三

香雪庵筆書丙集

山陰 平步青 景孫 纂

辛夷垞叢言

格言

戒殺

陳退庵蓮花筏

卷一

戒殺生四則之二云殺業之重貧家少富貴

家多尋常富貴家猶少惟富室鹽商及官場爲多以醢客及送席爲常事也余昔在邗上爲水陸往來之衝賓客過境則送滿漢席合雞豚魚鰕計之一席計百餘命其實受者並未寓目更無論適口矣余以茶葉筍脯南棗桂圓金腿紹酒小菜餅餌等物代之受者適用不受則尙可存以待他日之用每月以四五次計每年所全數千命矣至於醢客戕害物命更甚故予有句云堂前歌舞開筵日厨下刀砧瀝血晨紀實也嘗經年不醢客

並勸人不醺客招飲者亦婉辭謝之庸按名臣言行錄外集卷六

呂希哲爲郡令公帑多畜鰕魚諸乾物及筍乾葷乾以待賓友以減雞鴨等生命也頤道所爲本之紫薇旣免殺生又全儉德

勸學文

堅瓠戊集卷一舊傳勉學歌四章惜不知誰作庸按古文珠函已

載之高拱本語云偶見一學究壁上書宋眞宗勸學文云書中

自有黃金屋書中自有千鍾粟書中車馬多如簇書中有女顏

如玉子書其後云誠如此訓則其所養成者皆淫佚驕侈殘民

蠹國之人使在位皆若人殊可憂也三魚堂文集今本無養正遺規采之

傅元鼎曰古有作勸學詩者備言書中所有以敵世俗曰自有

黃金屋曰自有千鍾粟曰有女顏如玉曰車馬多如簇此語流

傳至今沁人骨髓祖父以此望兒孫師長以此教子弟若曰果

能金多粟富兼妻妾車馬之奉讀書之志願已遂能事已畢一  
入仕途凡所施爲濁穢邪曲安有清正之望陳宏謀評曰鄉塾  
中多以此爲讀書人佳話者學術旣非仕風安得不壞有心者  
所宜喚醒而切戒也庸按文襄清獻文恭三公所言則科名之  
佳話迺龍斷之賤夫然漢儒剛正如夏侯勝尙有取青紫如拾  
芥語韓文公符讀書城南詩亦爲後人誚議況以中材而處晚  
近非天挺奇骨烏能不爲流俗所歆動而超然有以自異哉

### 昏姻

司馬溫公論婚姻云借使因婦財以致富依婦勢以取貴苟有  
丈夫之志氣者能無媿乎庸按新唐書王義方傳淹究經術性  
褻特高自標樹魏徵異之欲妻以夫人之姪辭不取俄而徵薨  
乃娶人間其然曰初不附宰相今感知已故也宋人如傅公晦

蔡登進士蔡京欲妻以女拒弗答

後娶趙挺之女不可解

胡明仲寅初擢

第中書侍郎張邦昌欲以女妻之不許洪忠宣皓以諸生待廷試京師伯父給事位南牀王黼爲中執法慕皓爲人欲女以女弟給事以同臺故曲爲平章皓懇拜曰婦所以事舅姑也家素壁立今暴得一官乃令鼎貴薦女如父母何暨擢第朱勔復請婚資送萬計且啗以顯仕拒尤力朱不獲命黼榜中周審言壻之及周直內閣服金帶爲秀州守皓適在幕下人爲皓惜之視之蔑如也皓娶沈氏左大中大夫復女時沈兄太學博士松年在京師聞皓名定昏焉郭知運登紹興甲科時相強與爲婚知運弗樂訖停婚焉時相蓋秦繆醜此外尙多有之蘇文忠公秦穆公墓詩云今人不復見此等迺以所見疑古人古人行事光明磊落可攷猶且疑之況同爲今人而寒素自守不敢爲鼎貴所嚮王粲非壻才子才詩所謂緣薄

福薄耳於

何損豪末且世正不乏秀州守不卑作贅曲爲

平章束縛得定者更自有人而羣疑眾詢甚至恨不殺之割之  
君有不共戴天之讎然者不特無惻隱之心無是非之心并欲  
使天下寒士必求婚王謝無羞惡之心辭讓之心抑獨何歟

虞翻與弟書云長子容當爲求婦遠求小姓足使生子天之福  
人不在貴族芝草無根醴泉無源朱文端集中擇婦一條引此  
云此論可破世俗扳附之妄然必求小姓則亦未當鄭公子忽  
辭齊婚曰齊大國非我匹所謂匹者惟其稱而已勝我者非匹  
不如我者亦非匹也芝草不生糞壤醴泉不出汙泥此必然之  
理也大戴禮云謹爲子取婦必擇孝弟世有行義者如是則  
其子孫慈孝不敢淫暴黨無不善三族輔之故曰鳳皇生而有  
仁義之意虎狼生而有貪戾之心兩者不等各以其母晉武帝

爲子擇配曰衛氏種賢而多子賈氏種妬而少子卽戴記各以其母之謂也擇婦者可不慎歟庸按文端不如我者亦非匹之說深明禮意仲翔處亂世懼爲富貴所累論涉偏宕非正訓也往餘姚朱久香閣學年丈嘗言擇配不可取暴富之家以其氣已洩不可長也亦不必專求舊家以門戶旣衰其氣已竭其生不蕃也惟取忠厚有行誼氣運方隆而未熾爲最宜閣學所言似本文端

姚端恪公

桐城姚端恪公文集長於奏疏居言路時建白最多家居十四年與當路書爲桑梓陳說利病如與蔡漕帥士英書請撥皖南米爲皖兵運二糧與張撫軍書言蘆洲戶名與清丈不符非隱匿與朱雲門中丞書言浙中丈田增畝之害剖晰分明使筆如

舌皆明目張膽言之而與查孟如兄弟復程賓梧二書閱歷人情深明天道痛快淋漓尤爲布帛菽粟之論不當以文字言也與查書略云昔之言惜福者宜在廊廟今之言惜福者更宜在山林竹籬茅舍可易言哉惜福則思見在之難於消也思所以納之又恐將來之難於繼也思所以積之敬以老生常談之言進曰勤曰樸曰利濟而已山中受用全在一閒然受病亦在一閒所謂閒者少思寡欲甯靜恬淡而已若夫暖衣飽食無事無爲積日而月月而歲歲而衰老豈少哉人不勤則天或閒之往往壽算未盡福祿先盡長駕短馭早年休息又人不自勤則天或勤之苦境忽來禍患紛至身勞心疲求閒不得弟病臥山中每以此自警深山靜息亦每日作小小功課夕則記之至於山中風氣樸其本然然始樸終華人情不免凡事仍舊則相安爭

新則相尙要當謹之於始防之於漸常不失本來面目自然永  
遠安靜利濟之事無大小無貴賤無難易久久不懈皆成善果  
昔鎮江太守葛繁每日必行一二利人濟物事或以力不足爲  
言公指座腳踏曰如此物置之不得其所暗中或至損人足我  
爲正之人渴與之杯茶寒與之薑湯皆是也推而廣之凡勸人  
一善言止人一邪行放一生節一殺逐日可行無難爲者但恐  
因循擔閣誤卻一生復程書略云夫倍千人之福祿者必有過  
於千人之功德倍萬人之福祿者必有過於萬人之功德功德  
過於福祿者福祿與日俱增福祿過於功德者福祿與歲俱減  
功德者福祿之母福祿者功德之子子壯則母必衰枝繁則根  
必瘠福祿之盛可喜尤可懼也親翁以一人之身綜覈乎千百  
人之手目人世之至勞至苦無以踰於親翁者矣而況世變日

繁人情叵測懷刺而升堂者盡懷機智握手而示款曲者各具  
肺腸欲結納以成歡則求者不以無厭爲慚而應者必以不繼  
成怨欲杜門以謝客則暗投者不恥爲無因之前而斂迹者亦  
難爲踰垣之避親讎無定局而戈矛或伏於肘腋之中常變無  
定形而覺隙或生於意量之表或彌縫其東而起於西或捍禦  
其前而潰於後微風所以生波風定而波不息擊石所以取火  
石捐而火仍焚凡此者皆令人心血爲枯形神俱瘁願歲以入  
息爲率而三分之一以治生產貽子孫一爲來往酬應之具以  
其一爲積累功德之費天下功德之事未有不藉福祿而成者  
也據書中所言賓梧殆淮陽總商故端恪以福田利益歆動之  
爲中下人說法不得以植善緣而冀福報謂其立言太卑近於  
二氏也北略列之從逆諸臣中云改密雲縣令殆出長班投謁

端恪不知初未嘗汗偽命故貳臣傳無之

依外家法

大雲山房文彙二集卷四黃太孺人墓表張南山先生維屏祖母

也中云期功之戚無可倚遂攜子居母家共室而自爲爨母及兄輕之以爲言則涕泣曰吾母子依吾母吾兄惟母兄保護之然苟不自食此髻齡者長無立志矣且張氏之祖宗子孫何以爲門戶乎如是者十二年始異居烏虜可謂知大體矣又云今太孺人不使其子食於外氏以長以成使張氏至今有卓然之氣此可謂不幸依外氏之式矣潘四農養一齋集亦有劉節母傳云仍奉外王母居復購一室待外王母不諱外王母卒劉氏果有爭者曰何故以劉之室治王氏喪證之契乃王名爭者悔其周綴如此鄧伯昭瑤雙梧山館文鈔卷六節母史太孺人八十

壽言彙編敘云周翁割宅數椽以居或小極則自歎曰吾居他人宅卽不虞者勢當鑿後垣以出矣大令時近冠聞之大痛請於父友別賃屋居而自授徒資養合三文觀之可爲家毀依人者法然人心不古母兄或可依嫂不可依以別賃爲上也

試題出處宜告人

蓬窗附錄引柳下咫聞考試翰詹各臣命題稍僻皆不知所出傳文忠公恆問閱卷諸公曰豈無一二知之者乎曰止有一卷知之公曰此人宜置之劣等彼旣知出處則當布告同人柰何祕而不宣此非端人也公此言真能從風俗人心起見不以一知半解取人小倉山房文集卷六湖北布政使徐公垣傳贊云余與公同習國書廷試時諸翰林掩護其卷栩栩自私而公獨任人窺覲有詢必告其心地光明亦可想見容秋曰文忠語自是

大臣觀人於微紫垣方伯亦不可及壬戌 朝考題論爲求賢  
審官余記出毛詩卷耳序詢之朱肯夫逡巡未答時諸同年聚  
語殿門簷下有詢予者予告之且曰不記全文宜再請益熟於  
注疏者正商榷閒貴筑楊茹香同年取片紙錄詩序粘於柱閒  
同人爭趨觀以爲然同試者無不從序說立論當時予甚愧荒  
陋而服茹香之有學大度使文忠見之當大激賞丙寅 大考  
翰詹賦爲黼黻昭文出唐無名氏九月授衣賦諸人慳不知所  
出或有以爲左桓二年臧哀伯語興義景劒泉師曰非也哀伯  
語乃袞冕黻珽昭其度也下文火龍黼黻昭其文也自爲句此  
必昔人合兩文爲一何得以爲哀伯語同人皆以爲然惟漢軍  
某太史獨以爲出左傳賦首臧哀伯云云予見而阻之渠以已  
繕正不便刮易後竟列三等四十八名罰奉一年己未會試詩

題爲高車高棚得從字場中亦鮮知爲史記循吏傳孫叔敖事  
惟錢塘伊樂曉具知本末亦取片紙書示同號蕭山丁天香得  
以示會稽某公總裁初以江甯蔡琳卷掄元嫌詩不點出處易  
之天香卷未出房伊竟以次場墨污被貼科名眞有幸有不幸  
哉因容秋語而備述之彌思茹香遇羹兩君不置云

擬墨不可輕作

湛園未定彙雜著張文寶一則云後唐張文寶知貢舉進士有  
覆落者下學士院作詩賦貢舉格學士李懌曰予少舉進士登  
科蓋偶然耳後生可畏來者未可量假令予復就試禮部未必  
不落第安能與英俊爲准格間者多其知體金明昌中禮部尙  
書張行簡轉對言擬作程文本欲爲考試之式今會試考試官  
御試讀卷官皆居顯職擢第後離筆硯久不復常習今臨試擬

作之文稍有不工徒起謗議詔罷之此二段議論皆得體蘇子瞻曰麻衣如再著墨水真可飲前輩虛心如此亦是實理今制試錄不用程文是也而淺學小生紛紛擬作必爲二君含笑於地下矣庸按姜文標題似誤或作書張文寶傳後前一段震川集亦引之蓋本歐陽五代史記薛史擇傳作擇笑而答曰李擇識字有數頃歲因人偶得及第敢與後生髦俊爲之標格假令今卻稱進士就春官求試落第必矣格賦格詩不敢應詔君子多其識大體

北朝造像不必學楷書不可寫古字

老學庵筆記卷四漢隸歲久風雨剝蝕故其字無復鋒鋷近者杜仲微乃故用禿筆作隸自謂得漢刻遺法豈其然乎柳南續筆卷四漢碑八分書歲久類多剝蝕後人輒效碑上字作剝蝕狀此

病自元人作俑至本朝谷口鄭鑑尤甚何義門嘗言谷口八分書近日江以南頗重之然如人體患惡瘡甚可憎疾家次山爲余述之余因笑曰若然則彼重之者亦大類嗜痂矣肅按柳南之言與放翁合或卽得之筆記而忘所出近人好撫北魏殘碑及新出造像其說始於阮文達之南北書派論北碑南帖論然文達作隸正書尙守前人架壘不專用北派也其後武進張婉紉女史綸英翰風三女出始專門名家涇包安吳諸君和之至今日而益盛甚至取造像惡札而臨撫之亦豈眞得旃裘遺法乎林鑑塘前輩春溥宜略識字卷上引蔡珠淵云書體厯代遞殊玉篇將籀古篆文翻作眞書筆畫祇可略存古人遺意以便參攷在書家則自鍾王及唐宋元明法帖未聞楷書中有所謂古字者至明末王鐸作俑好奇者效尤流爲惡習學者切宜戒之若周禮

史漢等書所有則可用庸按王惺齋云今之學者於經史韓歐所用之字概置不用獨好用許氏說文字隨園所謂字古而文不古杜仲微隸不傳谷口亦何足學孟津貳臣又豈可效尤蹈惡習乎

### 兄弟合葬

廊齋雜記

七卷

順德張藥房編修與弟玉洲孝廉

錦麟

友愛兄弟

合墳編修潘宜人與孝廉婦節孝馮孺人娣姒亦合墳攷宋書張暢愛弟輯臨終遺命與輯合墳宋劉翬家娣姒合墳可知今人行事暗合古人者多矣庸按水心撰忠翊郎致仕蔡君待時墓誌銘與弟待用愛友遺命同穴異壙望谿先生文集卷十雷氏先墓表云唐昭宗時有子八人生相愛約葬同邱冢以次平列墓碑巋然又云予兄弟三人弟椒塗早夭而兄復中道棄余

臨終命三人必同邱不得以婦附族姻士友嘖嘖焉雖子姓不能無疑也其後聞甯都魏禧兄弟嘗行此而今復得雷氏上祖事用此知是乃篤於兄弟者之恆情雖異於俗而非有過於義也又云自周以前本無婦必耐夫之禮而曷以兄弟同邱爲怪詫哉而卷十甲辰示道希兄弟之七云康熙辛巳葬兄於泉井以弟從自余邁禰北徙道希危疾連年累歲術者曰此陰流入墓之效也余始不信忽夢兄臨大淵躍入自沈通書南中命道希啟墓鑿土三尺見水乃起柩權厝以待卜兆又云若懲前事而畏形家言則兄與弟其冢而余他日別葬於義亦可但毋與婦人合以隳先兄之命己酉四月又示道希蓋道永欲以母耐而道希惑之及得先生札依古族葬而少變以從宜卜兆蔣甸司諭公居中百川椒塗同穴居右百川室張及蔡夫人同穴居

左而蘇愔元憲先生年譜引家譜云葬江甯縣建業三圖沙場  
邨龍塘百川椒塗同邱則又非蔣甸之兆矣張蔡二夫人則葬  
江甯縣石潭菖蒲山蓋仍遵百川治命也余九世祖潑水府君  
亦與兄聯璧公葬婁公姚家山如蔣甸族葬法望谿不喜視雜  
書故不引張劉蔡諸公事百川亦有所本非與古人暗合亦不  
特馬江文緒兄弟爲然也

天岳山館文鈔卷四先世父暨先府君合葬墓碑云古無兄  
弟合葬之明文洪氏隸釋錄郎中馬江碑述其中弟文緒事  
實載云因與其季合厝  
故作碑並及之也云云

### 居喪不作詩文

吳草廬題朱文公答陳正己講學墨帖云眉山二蘇兄弟文人  
爾而其居喪也再期之內禁斷作詩作文寂無一語是亦嘗講  
學乎喪禮也湯修業前表哀序則云居憂不作詩始自六朝而

嚴於北宋不拘小節如蘇文忠兄弟猶率履不越然亭林集中  
表哀槩葬諸詩歲月可攷皆居憂時作豈昧於禮耶偶作韻語  
以抒哀悃亦無不可不必援祥琴以爲例也且蓼莪六章字字  
血淚安知不從苦塊中作乎郭麐樗園消夏錄下亦云詩近樂  
章自古爲詩以哭其父母皆未有袁子才云傳咸文蓋至哀不  
文唐人爲其親及姊妹兄弟墓石之文志而不銘亦此志也近  
惟唐堂先生有絕句云病中日日呼兒聲今日呼耶耶不膺夜  
臺幽處不可步何不呼兒持漆鐙如湯郭說則居哀作詩亦不  
爲過至記所云大功廢業朱子謂不聽樂非不讀書業卽詩之  
廢業也隨園詩話卷五說微誤

### 刻槩娶小

明復社盛時依附者多時人謔之曰頭裏一頂書厨謂方手裏

一串數珠口裏一聲天如又曰坐乘轎改箇號刻部稟討箇小

冬夜箋記作京師諺  
日改箇號娶箇小

煙嶼樓詩集

卷十

送葉蒞田

之蕃

司教雲

和云一官一集一姬人俗語丹青有宿因看徧括蒼好山色一  
囊佳句一時新自注吾鄉諺語云做一任教刻一冊稟娶一个  
小則甬東風氣較明末有過之無不及荷盤淡泊乃能築氏麻  
沙輕綃捧硯亦豪矣哉昨秋田銓注簪谿子舉徐詩調之笑曰  
稟不敢刻小不能娶惟徧看好山色不妨長作括蒼主人耳病  
榻孱夫聞之不禁色妬

關房

關房惡俗昉自燕人見班書地理志抱朴子疾謬篇曾痛言之  
升菴丹鉛錄引之謂自晉世已然不知漢時有之非始典午也  
張清恪公禁昏嫁喪葬示云合昏之夕親戚朋友夥飲徹宵擁

眾入房披帷接枕名曰鬧房褻狎瀆亂傷風敗俗此其甚也夏  
醴谷昏說云昏禮不用樂幽陰之義也昏禮不賀人之序也今  
則置酒高會而澆弛無行之徒沈湎喧呶甚且以媒嬾之詞相  
軋以爲笑樂此又俗尙之偷有力者宜亟挽之也庸按晚近偷  
薄而憲爲無謂之酬應欲其不賀勢不可行必不得已而從俗  
則用樂設燕而禁止媒嬾鬧房可也文章游戲二編卷五有代江  
西新城令禁止鬧房告示中云樂酒無厭竟永夕而永朝不醉  
無歸恆卜晝而卜夜無論尊卑上下盡爲入幕之賓任憑遠近  
親疏偕來不速之客縱酣嬉淋漓之不思卽紛紜雜沓以何嫌  
夫爲酒食而召親朋以厚別也乃入閨幃而忌形迹善戲謔兮  
羣居一室之中甚至同席而坐笑言啞啞居然附和同聲婦子  
嘻嘻未免外觀不雅評者以爲語極和平不失風人筆墨未免

阿好至云事誠惡薄未知昉自何年則未攷班志葛書也

不根之謗

顧亭林年譜庚寅正月五日妾韓生子詒穀車守謙案崑山張

皋亭

元唐

張氏卮言謂先生無子蓋天奄也殊詭按明之楊文

襄國朝梁山舟韓桂舫皆有此不根之謗諸公安能如趙仲讓

傾卧厥形悉表露爲襄城君孫壽見乎

見風俗通容秋日晉書卷九十七

四夷大宛國其俗娶婦以三婢試之不男者絕婚病榻漫記禮

部選駙馬錦衣百戶視其陰果爾安有元廣妄語耶一座噴飯

本事詩吳武陵爲桂管副使以球場致宴婦女於看棚聚觀意

甚恥之欲復其辱乃止臺盤坐褰衣裸露以溺亦仲讓之流也

元廣小人正宜以趙吳法復之

鄧粲晉紀載周伯仁詣紀瞻觀伎於眾中欲通瞻愛妾露其

醜穢顏無作色魏叔子日錄卷三史論謂疏誕斷不至此必當時小人誦之與仲讓不同故不引

### 晚昏

晚昏顧協爲人所輕通倪如隨園尙有慚愧少年貧裏過之句若阮修至使名流助錢尤爲有志者所恥不屑爲也古人晚昏若晁文元之等不可僂指數國朝尙多有之見於別集者望谿集外文卷七彭訥菴墓誌銘云娶夫人郭氏少歲近四十矣後舉四子及孫皆登甲乙科一子官翰林君年九十有二夫人八十有二實親見之又云子廷典廷謨並戊子舉人廷訓翰林院編修廷誥癸巳副榜孫五長元瑾與廷誥同中副榜小倉山房文集卷六贈編修蔣公適園傳云公四十六歲始娶鍾夫人生子士銓官編修公卒時年七十一猶及見士銓舉於鄉也鍾按

夫人卒惜抱文後集七卷贈文林郎鎮安縣知縣婺源黃君墓

誌銘云至蕪湖君時年已六十矣始娶婦於蕪湖顏氏時年卅九而

同歸婺源子輝以拔貢爲鎮安知縣君卒年九十有六顏孺人

卒年八十有六庸按廷訓子爲文勤公元瑞元琬文勤子翼蒙

翼蒙弟翔子邦駿邦疇四世六詞林清容曾孫爲文恪公志章

黃於衰老得妻以上壽終昏雖晚亦何遜少年佳耦哉若困厄

踰壯通籍始昏在苒十五年再嫺而爲人所忤母孩俱斃又往

苒十年置鎚而甫獲一雄六十衰翁始作爺客來強半當孫看

彭蔣視固霄壤黃孝子知之哇其笑矣李檀河答伍夢符書云

孫明復踰艾而受李迪從女其子卽不知何名每讀之輒有景

升豚犬之懼也

蘇文忠公

昔人謂東坡身上事事爽庸謂文忠安心順運其文亦字字爽也姑以數條明之如與趙晦之書云某謫居既久安土忘懷一如本是黃州人元不出仕而已答李寺丞云僕雖遭憂患狼狽然譬如當初不及第卽諸事易了荷憂患之深故以解懸慮與程正輔云某覩近事已絕北歸之望然中甚安之未說妙理達觀但譬如元是惠州秀才累舉不第有何不可知之免憂記游松風亭云予嘗寓居惠州嘉祐寺縱步松風亭下足力疲乏思欲就牀止息仰望亭宇尙在木末意謂如何得是良久忽曰此閒有甚麼歇不得處由是心若掛鉤之魚忽得解脫若人悟此雖兩陣相接鼓聲如雷霆進則死敵退則死法當恁麼時也不妨就歇在僑耳因試筆自書云將至曲江船上灘欹側撐者百指篙聲石聲淅然四顧皆濤瀨面無人色而吾作字不少衰何

也吾更變亦多矣置筆而起終不能一事孰與且作字乎但舉五條文忠安士忘懷雖屬達觀實爲妙理然亦由更變之多末一條李西漚銅豹館飢書入之委順公文如此者甚多世人但傳上可侍玉皇大帝下可陪卑田院乞兒未足以盡文忠也

負心之報

黃宗義

氏家錄南浦公諱堂字勉敬螫庵公

名伯子也

少隨螫

庵公之官建甯令聞其才引入便使拜其夫人欲得公壻之其女亦竊窺公心說而好之而螫庵公不欲越境昏姻固辭於令其女聞之遂自縊死後十五年宏治乙卯公舉於山東偕計吏北上覩舟子之女慘然不樂舟子問之曰曩吾約婚建甯令女女乃爲我而死汝女何其似也舟子遂以其女許公爲期而去已而公會試不第竟歸而讀書南浦亦忘所期於舟子之女者

乃舟子之女待公不至又自縊死後七年王戊公會試入場屋  
恍忽見舟子之女爲之磨墨公既第未廷試而卒然則小說家  
所言韋皋之事果不可謂之誣耶庸謂建甯令女之自經不得  
爲南浦咎若舟子之女爲期而忘之亦使隕於非命負心甚矣  
入闈磨墨何面目對之登第卽死亦云幸哉

### 李義山

新書李商隱傳歲具資裝使隨計又云牛李黨人蚩謫商隱以  
爲詭薄無行其排笮之庸按令狐文公奇義山文使與諸子游  
自河陽徙天平宣武三表署巡官又歲具資裝使隨計吏開成  
二年更以絢善高鎔獎譽甚力登第後依王茂元鄭亞絢謂其  
忘家恩歸窮自解而憾不置雖黨人蚩謫排笮誣其詭薄無行  
然令狐小人其待義山不可謂不至既壻王氏復依鄭亞安得

不怒其負心亦可見才人未達時不可輕受人恩後難自立也

讀書五失

袁桷清容集

卷十二

袁氏新書自敘余少讀書有五失焉雅觀而

無擇濫閱而少思其失也博而寡要攷古人之言行意常退縮不敢望其失也儒而無立纂鈔史籍之故實一未終而屢更端其失也勞而無成聞人之長惟恐不及將疾趨從之而輒出其後其失也欲速而過高好學爲文未能畜其本經術隱奧茫乎其無所適從茫然而無所關決是又失之甚者也夫爲學之道用志不能不一用力不能不專農夫莽而廣種不如狹墾之爲實也工人泛而雜學不如一藝之爲精也後蘇天爵銘清容墓節此敘入之云公之斯言深中學者貪多苟且之病庸癸亥讀清容集錄庋座右以自警倏忽廿年失猶如前而讀書不及少

時貪多固學者之病然猶愈於專已守殘汗簡未青元髮已皓  
嗟何及矣

霞外攬屑卷四目錄

香雪畸宰書丙集

山陰 平步青 景孫 纂

夫杉山館計聞

里事

會鄒檜

餘姚二城

毛西河

儀禮易讀

金士騰

金礪

宋是非昱亦非祖昱

何經文

沈鎮東封尚義伯非保定

白洋朱氏

妒婦傳

朱存齋比部軼事

蛾術堂集

茹韻香先生

王南陔中丞恭甫上舍著述

汪南城

五經旁訓辨體合訂

十一山山房

寒蘭蕩

侯山卽小隱山

夕葵園孟氏

倪文正公與弟獻汝二書

祁二綬

張葆生

青湖集校語

火珠橋

平陽祁忠惠別業之誤

觀釐橋

鑑湖邨居

陶山游記

胡天游穉威

南疆佚史注

陳無波徵君

鯉浦本名邢浦亦作刑浦

蕊山

岳碑遺石

水則

筆獵

襟肩紅

赤金東字

越醫

厲布衣

徐天池白描錢帖冊子

孟次微監州

明史無徐人龍傳

皋埠 鵝鼻 漓渚

瓢魚

鮎

棧

揉渡船

安昌可作安滄

山陰徐志

吳荔平

宇泰閣

水陸

借奩

風月無邊

求好壻不思其姓氏

萃屋

張厚齋集四書文

陶書倉室張宜人

灰竈頭

綵旗聯語

魯謙菴通政

觀菴金氏

大小茹

拾草寫淨

茹三樵

漢後隋前

前後輩

霞外攬屑卷四

香雪庵筆書丙集

山陰 平步青 景孫 纂

夫移山館計聞 里事

會鄒檜

晉書地理志咸和五年以王舒爲會稽內史舒以父名會不拜

詔改會爲鄒

卷七

舒傳同

庸

按左傳僖公三十五年文夫人斂

而葬之鄒城之下杜注鄒城故檜國在滎陽密縣東北又襄公

二十九年自鄒以下詩檜譜正義引世本會人卽檜之祖也漢

書地理志號檜爲大師古曰會讀曰鄒字或作檜說文解字會

部會木部檜皆非地名邑部鄒下祝融之後妘姓所封潛洧之

閒鄭滅之从邑會聲古外切是鄒爲正字會爲媾文或作檜者

段借字也參同契鄒國鄙夫幽谷朽生朱子注云當作會稽或

是魏隱語作鄆徐文靖管城碩記亦引晉書地理志而又云或當時本云會國而注錄之家因改爲鄆國也似未檢孔疏顏注并許君說

餘姚二城

餘姚縣治夾江南北二城相傳新城爲明世宗築以居謝文正者西河台集江甯北捕通判呂君墓表云世宗重太傅先於餘姚建相國里第爲別築一城居之復於郡治山陰地更造行府則以爲爲文安築庸按紹興府志卷四人物呂本傳云建議築新城於姚江南爲鄉里保障二地理云江南城明嘉靖三十六年以倭患建徐階記云議始於文安郎中邵德久上疏言江南不可以無城狀天子可之於是總督都御史胡宗憲寶典領其事工始於丁巳九月己卯次年六月辛卯成據府志相傳語不

足據毛表亦無稽之言而闌入金石未免失之不放昔人於西河集多不滿微特經學卽文章亦宜分別觀之

毛西河

蛾術編鄭氏品藻朱勝非紺珠集引雞跖集王弼注易刻木偶爲鄭康成像見其所誤輒訶斥之西莊案云雖屬笑端如弼之妄此事容或有之庸按太平廣記引幽明錄但云王輔嗣注易

輒笑鄭康成爲儒云老奴無意無刻像訶斥事綠雪堂集卷十

跋鉛山先生請重修應宿閣書引鉛山言謂西河奴視朱子幾

同讎敵及病危自嚼其舌稱快舌盡乃死此語見忠雅堂文集

卷八再貽甯紹台道漆蘭谷觀察恂書不知何本西河詆毀朱子

詞氣激嫚有失著書體裁以此不得入國史儒林而列文苑

越人相傳謂其束橐爲朱子像注有誤處輒撻之一如輔嗣之

於康成則又附會陸宅之事

堅瓠辛集卷二陸居仁讀論孟刻朱子像見有批繆則學像一下宅

之即代爲對而轉譌茲甚也

日朱某誤矣

儀禮易讀

綠蘿山莊詩集

卷十

懷人雜詠上之三十馬明經德純自注住

瀕海岳墅村授徒注經訓詁儀禮一編名曰先路時以碩果推

之

庸按紹興府志儒林馬駒字德淳會稽人年踰四十始爲山

陰諸生自號曰書饒著有儀禮易讀十七卷積四十年乃成又

有禮經先路十七卷碩果錄十卷四書偶見六卷卒年九十一

撰范家相詩譜自序在乙亥丙子年

今易讀坊間有傳本里塾盛行先路三種入

府志藝文而未有琴本亂後殆已亡佚矣

金士騰

金五芝

士騰詠烈堂合集自敘云今世學詩之徒類附合流派

不求自得魏武云撝之者富隨之者貧非處勢異也凡能自特起者類有絕人之姿累漸之學而俗儒新生朝見而夕爲之規其句調謂速肖耳其理乃愈隔絕遂復相繼訾笑而咎前者實非前者之咎也五芝字于上明末山陰增廣生龍武中協副總兵芝田冠第三子也爲黎博菴門下士晚號鏡漚萍鷗侶其集未梓

金劄

金庭新劄明事摘略自敘云蓋以補陳建通紀沈國元從信錄高汝拭法傳錄之闕采其未備勒成一書而以靖難忠臣略甲申殉難略乙酉補謚攷酉戌殉難略有明厯朝三元攷附焉其書今皆不傳劄官莊浪典史終雲夢典史五芝族子皆見湖南金氏譜

宋是非昱亦非祖昱

李集鶴徵錄

卷七 宋昱字古夏

本名如鎧字懼聞山陰人前諸生居

江頭里著有廬堂詩鈔秦瀛己未詞科錄則作宋昱云一名祖

昱

庸按李錄是而秦氏本竹垞手錄續題名單之誤也蔣嶠宋

仲眉傳云其先某自宋家塾贅居江頭邨父蝶菴有聲國學兄

弟四人伯叔季皆游於庠歲戊午

原本作庚申誤

叔氏是舉鴻博不就

今僑寓橋李宋長白柳亭詩話

卷十

從孫懼聞是有感遇百首

名負一時梓以問世後以博學鴻詞薦不赴其子泚爲松江別

駕父子俱歿於官署有一孫棄家爲僧詩亦無有傳之者又

卷二

三秦亭生平著述甚富歿後乏人經理大兒昱手訂其彙是

爲岸舫從孫本名如鎧昱爲岸舫長子本名祖昱是昱形近而

譌小峴併爲一人戴璐吏垣牘略作布衣宋是本不誤李亨特

紹興府志文苑云宋祖昱字西洲父俊乾隆丙辰以博學鴻詞徵不赴下注采訪則亦以是爲祖昱又謫康熙己未爲乾隆丙辰則視竹垞小峴爲更誤矣

岸舫原名俊字長白以字行號岸舫又號觀奕道人又有梅谿菊籬半齋無證慎旃諸印章昱字斌貽號西洲著有西洲類纂柳亭詩話

卷十

云次兒晟歸自嶺南按晟字

號西椒亦作

西樵卷三卷五先大夫字屢見是岸舫父曾官山西康熙乙卯六月自侍御舊宅徙居墨蓮巷爲青藤故里

卷二

云先公避世

以後手不釋卷家庋賜書萬卷朱墨淋漓兵燹之餘散亡過半

攷題名碑崇正戊辰有宋運昌字天岳號明翁山陰人官龍泉

知縣或行取入臺國變不仕未知是其人否

卷十

孫德參

宣化

家姪同榜生攷宣化爲康熙丁未進士題名碑有仁和宋嗣京

殆卽其人天岳天啟甲子亦以仁和籍中式也卷二徐銓成字御  
占爲余同年生則岸舫嘗舉拔萃它書作上舍生者誤後入姚  
啟聖吳興祚閩中幕府又有彤史燉一書今不傳卷五家弟存軒  
名偉子名祖塲益可證祖昱之爲昱初名也

何經文

聖武記

卷十

武事餘記云雍正元年貴州討廣順府之長寨苗

提督楊天縱連克五十餘寨獨羊城固未下撫臣何世璽檄安

順知府何經文佐其軍壁聳干級左徑如綫

陳碑作聳壁干級左傍徑如綫

軍束手經文問曰固何以名羊城土人

陳碑作盧生

對曰中曰外壁

陟不可上惟羊可上故名經文卽揚言吾且令士卒攀厓夜襲

而陰市羊數百頭斷水草二日會夜大霧晦黑乃設伏縱羊山

中走齧草藋藋有聲賊聞以爲我軍四面至遽下木石弩礮如

雨良久度且盡而所遺敢死士八百人已直趨左徑突登殺其  
守關者賊驚亂自相藉墜屋死遂斬其渠賀連莽李奇降其眾  
此見陳兆崙文集庸按宋史卷三百四十六趙逵傳政和五年晏州夷  
酋卜漏反據輪縛大囤其山崛起數百仞林箐深密夷奔潰者  
悉赴之乃壘石爲城外樹木柵當道開阡陌仆巨枿布渠答夾  
以守障俯瞰官軍矢石所中皆糜碎逵軍不能進閒從巡檢种  
友直田祐恭按視其旁山厓壁特峭絕賊恃之無守備逵欲襲  
取命友直祐恭軍其下而身當賊衝番軍迭攻之未旦鼓而進  
迨夕則止賊并力拒戰不得息友直所部多思黔土丁習生險  
而山多生猺逵遣土丁捕之伐去蒙密緣崩石挽藤葛而上得  
猺數十頭束麻作炬灌以膏蠟傳於猺背暮夜復遣土丁負繩  
梯登厓顛迺絕梯引下人人銜枚挈猺蟻附而上比雞鳴友直

祐恭與其眾悉登擁刀斧穿箐入及賊柵出火然炬猱熱狂跳  
賊廬舍皆茅竹猱竄其上火輒發賊號呼奔撲猱益驚火益熾  
官軍鼓譟破柵遙望見火麾眾躡雲梯攻其前兩軍相應賊擾  
亂不復能抗赴火墮厓死者不可計俘斬數千人卜漏突圍走  
輪多固追獲之晏州平經文之用羊與遁之用猱前後若出一  
轍在經文未必仿宋史而行宇宙閒何代無才增竈減竈皆古  
人已事不必謂田單火牛古法可一用不可再用也

沈鎮東封尙義伯非保定

蕭山長巷沈氏宗譜卷二有崇明參將晉封保定伯辰所公傳  
辰所名鎮東崇正甲戌武進士選平望守備升崇明參將甲申  
聞京師陷謀起兵赴難會福王立乃已以馬阮擅國棄官歸魯  
王監國起總兵加都督封保定伯以糧不足欲令諸帥畢西渡

沈舟破釜爲不反之計無應者退守富陽王航海鎮東行腳去

不知所往而

卷三

世系鎮東下小注生萬厯庚寅四月二日酉時

卒順治庚寅十月二十七日巳時似杖錫歸來首邱正斃幸矣

第據西河台集云魯王航海保定伯毛有倫扈宮眷及世子出

海旋歸命新朝不言所終荒朝搶擾爛胃羊頭原不足怪第鎮

東有倫何以同封保定据沈冰壺勝國傳略

卷五

魯王死事諸人

傳下于穎傳附沈東云武進士沈東以募眾封尙義伯云傳後

附記云沈東爲洪內院所取士遁匿其家久之事解贈資貿遷

航海歸遇颶風舟覆僅以身免以窮老終於家其鄉人猶嘖嘖

談尙義事指某地爲帥府暨幟處云是鎮東所封爲尙義非保

定沈譜似誤鎮東邵氏思復堂集作振東傳略止作東傳略與

鮎埼亭集于穎事略同作振東爲是同時振東族弟青來

邦通

輸餉助守固陵亦授官總兵旋即棄歸補堂

豫

其六世孫也撰

傳亦見譜中

白洋朱氏

白洋朱氏自襄毅公功在蜀黔先纓繼起魯監國時有公族弟贊元字懋聲號振岳少極貧以族子兆柏官翰林賣卜京師內監神其卜薦入高起潛幕授都司銜朱大典視漕兆柏鄉舉同年生也以贊元侂之署巡漕游擊旋薦之鳳督馬士英南都擢都督中軍僉事已由海道走歸越投閣臣田仰仰授爲後軍都督同知挂將軍印已復投大典命防守蘭谿丙戌八月城破與弟寅元俱戰死妻王氏投井死子兆麟寅元子兆鳳俱不知所終兆柏襄毅兄宏翰長子也宏翰字懋德號清埜兆柏天啟乙丑庶吉士由簡討厯詹事辛巳九月奉母諱歸南都以士英柄

政不出監國起長禮部兼攝銓政時方王擅國柄兆柏裁之丙戌卒襲毅仲子兆宜字仲含號壺巖甲戌以諸生襲錦衣衛指揮使壬午擢南鎮撫司僉書官事乙酉守戰江上者一載已入越城同張蒼水奉監國返台州由海門下舟山見城孤不足恃復歸會蒼水於駝峰之顛監軍管從龍率舟師來會謀西渡從龍忽拔營徑去蒼水亦以無軍入會稽山兆宜憤鬱遂病閒行至嘉興嘔血斗餘死年四十七子用礪官永平同知族弟兆殷字夏夫號華臣崇正丁丑年十八補諸生壬午於蒼水房師山陰令錢世貴之門一見定交甲申再會乙酉蒼水來行朝兆殷與兆宜亦率副將余應元都司王有功等從海道駐兵小慶後監國返台州下舟山兆殷徒步乞師遣客魯恂招蒼水會於駝峰終以兵單不可爲蒼水上會稽兆宜去櫓李兆殷由夏履橋

入暨陽復與蒼水同事舟山蛟門之敗兆殷潛歸蒼水正命初  
葬寶俶塔後移南屏兆殷每歲寒食素衣草履渡江約同志數  
人醢酒悲號竟日焉四人者不愧襄毅家風譜皆有傳因掇其  
略以補雙韭蒼水神道碑所未備譜作於兆殷其傳不知何人  
所續亦不言所卒之年小腆紀敘搶攘一年閩史闕如行朝厯  
錄故國喬木之枝葉質蝕不傳如夏夫者又豈少哉

妒婦傳

予所見白洋朱氏譜僅鈔本二帙皆家傳非全譜也卷端有順  
治戊戌仲冬夏夫序傳分子目十六日碩隱筮仕儒林逸民遺  
佚游俠正己射書數合三篇一傳貨殖方士日者畸行懿範烈婦節  
婦妒婦各繫以小序妒婦傳序曰后妃不妒忌而子孫眾多夫  
妒不至於絕嗣而妒必不傳吾越素稱朱門然先世亦未有聞

者及今自來氏始其詳有足傳者陋而多智貪而無禮憑藉世資坐致數萬昔舉陶備五刑以懲無良彼特倣而二十之以治妾媵凡所爲輒不經意卒至亡家絕嗣兢兢一身荷荷而死是亦可以鑑矣爲作妒婦傳傳云妒婦來氏乃士服先生之妻貌甚陋士服諱兆棠幼縱酒不好讀書然天資過人遇試亦隨手成文補邑弟子員與兄詹事茂如公不類娶蕭山來氏夫婦頗相稱苦妒甚無子士服懼之婢有幸者輒斃之略有不可其意者盡備五毒夜以浴盆著水使士服頂跪達旦盛夏時但聞躑躅聲終夜不絕人於隙窺之則爲蟲蟲所窘兩手掖盆不能撲以雙足數易而已它事多類此卒以絕嗣後有婢嫁潘姓生子父清楚公令歸爲之延師肄業多方欲其成人聘諸暨進士史繼齋女輒不肖竊契券嫖賭傾家而去攷其生年則士服卒後

四年所產也今以士接公兆相次子用格承祀按兆相海蠻次子江上之役以諸生佐餉事姪婦有傳爲自來譜系家勸見書

藝文志有宋虞通之  
姪記二卷書不傳

殆昔人作家構杙之意也

朱存齋比部軼事

今古奇觀小說

卷二

有喬太守亂點圯央譜一則近已抽燬然

寶明嘉靖時白洋朱存齋比部簪官松江通判攝府時事據家傳俞姓者未婚適壻邁疾篤舅姑欲納婦以徵喜姻畢卽返卻之不得行將恐其勿愈也致累吾女遂以弟文之而往至則其壻果因疾篤不能起而以其女弟文之而將事留廟見不卽返仍以其女陪嬖宿焉歸甯之日始覺爲婦所賣訟之公公詢之俱未冰聘因判合焉載在傳奇彰彰如也譜所云傳奇卽此齣特易朱爲喬耳朱後官南刑部廣東司郎中嚴嵩壻犯法一日

殺七命撫按不敢問有控之南部者公與大司寇何鼐按其事  
嵩以二函一投公一投鼐求釋公超擢鼐北轉廷鞫時公廉得  
其實竟議辟鼐懼以嵩屬懇公公峻拒之鼐愈迫計無所出遂  
親至公案以手止公因令公成牘公憤甚因以墨塗鼐面直指  
其奸相爭於堂上毀冠裂袍帶棄官歸而鼐因是得移北有殺  
楊忠愍公之獄蓋舊制郎執筆尙書籤押而已比部有此大節  
足傳其判俞氏婚亦隱惡得情不害其爲良吏或以游戲作劇  
譏之過矣譜又有饒州同知海嵩公啟元傳云鼐葬父詔於塗  
山展山西之陽毀寺爲塋山上平陽數十畝相傳禹會諸侯地尉  
官嘉靖癸卯三月有僧結茅其旁鼐孫繼高以朱氏有墨塗鼐  
臉之讎以公名首之撫按越中官會勘直公繼高不得逞欲俟  
公入城殺之公跳去始免按繼高爲鼐兄鎬孫見西溟撰其孫

宏仁銘非齋孫傳脫一從字也堅瓠癸集卷三姑姦成婚條引暇  
弋編作孫潤劉女其判語與小說略同祕集卷四引濯纓亭襍記  
則又以劉爲王正德閒事殆一事誤傳

蛾術堂集

蛾術堂集十四種蕭山沈小勇先生孫箸說經諸則仿日知錄  
袁浦札記亦有心得語四六學六朝初唐四傑尙有可採散文  
則未能免俗安徽通志緣起一篇尤淺易韻語亦下駟讀經如  
面僅涵詠文義無所攷證 皇清經解淵源錄經解提要二種  
厘止數策似未成書淵源錄頗不滿於江氏尙書△注音疏程  
氏通藝錄尤致詆娒二書具在小勇似未深究艮庭易疇堂與  
也淵源外編列書十二種直錄簡明目錄語匙一字發明殆鈔  
撮將爲論述張本門人不知誤入之以爲著述之一種若以周

官祿田攷爲齊侍郎作蓋沿經解總目之誤然提要中所採書後一段卽冠雲原本況篇末明有形又云三字又版心刻沈徵君周官祿田攷八字也卷端列王南陔戴金谿張鹿樵湯愷甫毛春門王小穀六先生鑒定殆引以爲重六公未盡見其書否則春門傳臚辛未以吏部主事用並未入館湛園爲康熙丁丑一甲三名己卯以北闈試事卒于請室並未受知

世宗且一甲二名爲嚴虞愷龍首爲李蟠非李紱不應全未糾正也每卷尾署弟子某校而全書攷文譌字複出失刪不可勝校就予所知乙之苦不能盡也宗滌翁作傳推小莠爲吾越漢學之碩果重論文齋筆錄中有此書敘推爲詞人學人合竹垞西河之長阿其所好矣

茹韻香先生

少時及見茹韻香先生

藥

循吏三樵兒子也以乾隆丙午副貢

生官松陽訓導年至八十腹笥便便四部七錄信口援引詩文

奇速頃刻萬言著有吟花書屋詩草百餘卷無力行世亂後皆

燬於賊惜哉先生在時曾錄定稟十六卷屬杜尺莊徵君付槩

未果爲先生外孫阮定山茂才

福康

取去今藏定山弟孝遜比

部

福昌

紅杏山莊按列朝詩集丁上李少卿開先爲文一篇輒

萬言一體輒百首不循格律詠諧調笑信手放筆袁履善名福

徵華亭人詩集甚富每一題輒蔓衍百餘首拖沓詰屈王元美

嘗醢客云今日分賦戲作袁履善體袁中郎記其事以爲笑

見

善詩

袁履

啟禎野乘卷七文光祿父在茲以程文奇爲禮官所糾遂不

復仕作梅花詩至萬五千言太青晚作嘉蓮詩七言今體至四

百餘首亘古未有吳城雲螭齋詩話吾讀方密述懷二百韻歎

爲奇絕已如讀三都賦至關中文太青有三百韻詩便當盡焚  
古今經史子集單看此一篇排律矣池北偶談卷十鄧燿條善  
細書絕技擅場所書洛神賦縱橫僅寸餘竭目力始悉其縷析  
絲分豪芒彪炳入法精勁行伍井然又能於粒米上書一絕句  
異哉先生之才奄有李袁文氏父子鄧彰甫之奇而無其失矣  
州見之定不敢薄視然卒以稟本繁夥藏庋未行平原才患其  
多與武林吳慶百同病可一慨也

王南陔中丞恭甫上舍著述

王南陔中丞

紹蘭

著書二十七種漆書古文尙書逸文攷一卷

杜林訓故逸文

附

桑欽古文尙書說地理志攷逸一卷中文尙

書

增

董仲舒詩說箋一卷匡說詩義疏一卷儀禮圖十七卷

國家八十一家三禮集義四十二卷

王端履墓誌銘  
作禮堂集義

周人禮說

八卷夏大正逸文攷一卷齊論語問王知道補亡一卷周人經

說八卷石渠議逸文攷一卷漢魏石經遺字攷二卷王誌凡將無

篇逸文注一卷說文集注一百二十四卷王誌云一百二十四冊未及脫棄說

文段注訂補六卷漢書地理志校正二卷袁宏後漢紀補證三

十卷王氏泰支瓜瓞譜七卷管子地員篇注四卷弟子職古本

攷一卷老莊急就章一卷呂氏春秋急就章十四卷王誌讀書無

雜記十二卷許鄭學廬存彙十卷初名思惟居士存稿古詩鈔二卷李杜

詩錄四卷唐人宮詞鈔三卷尙有少時所刻廣雅樓試卷林謫

人世丈式恭言幼時見其說文注彙盈十餘插架無慮千數卷

蓋欲舉四部巨帙隻字盡納之浚長書中其後定本爲一百二

十四冊此乃摺摭叢殘初彙耳長子延之上舍曼壽字恭甫能

傳其學著有易義述聞一卷揅菁說一卷十三經音彙十三卷

唐人經說鈎沈二卷後漢紀誤字校一卷三輔決錄逸文攷一

卷會稽典錄逸文一卷會稽先賢傳逸文附王隱晉書逸文一

卷靈素志疑二卷甲乙經輯注十二卷王叔和脈經校謄一卷

金匱要略脫簡附尙友紀聞三卷大蘇詩文鈔二卷存彙外皆

未刻辛酉之亂書頗散佚幼子道甫大令養壽僅重刻許鄭學

廬文八卷於保定光緒癸未夏吳縣丞趙某得集注一百十九

冊周人禮說周人經說說文段注訂補三種公孫子植明經寶

藏以泗洲胡雲楣許爲梓行二人舉彙本贈之又有仁和吳穎

芳西林說文理董四十卷亦未行世近時講小學者未之見爲

海內無第二本亦歸之卷帙繁夥汗青恐無日也經說歸吳縣

入功順堂叢書段注訂補十四卷刻於戊子管子地員篇注四

卷刻於庚寅近楊佩瑗取其前編殘棄刻入大亭山館叢書後

編未刻若前編之餘卷及正編楊未之見也

汪南城

汪龍莊先生循吏傳中人物也著述等身詳別卷長子繼壕字  
南城號後莊候選布政司經歷著書二十種左傳同名錄說  
文檢字古今韻檢讀史劄記餘暨舊聞元號韻緯  
國朝進士分姓部居明進士分姓部居國朝書學金  
石文跋尾金石時地表北苑貢茶錄注北苑別錄注  
煙草譜求己衷言責實瑣論太上感應篇攷原二十  
四孝攷證南城筆記後莊叢書就所名核之左傳同名  
錄所以補龍莊先生九史三史二十四史同姓名錄三書之闕  
說文檢字未知視毛謨本如何元號韻緯未知視李兆洛紀元  
編如何進士分姓部居則可以姓題名碑錄繙閱之煩此邵位  
西張石洲所欲爲而未暇者國朝書學當可續萬石園書學

彙編之後金石時地表當可補孫淵如寰宇訪碑錄之遺太上感應篇攷原足證惠定宇箋注謂魏晉人之有據舊聞筆記當亦有裨續修志乘者之採取惜未付刻亂後不知有藏本否雲楣以僕所舉各書名似得之汪氏硃卷履歷疑爲本無其書不復向蕭人探訪

### 五經旁訓辨體合訂

坊本五經旁訓越中童塾盛行以其書媚經文皆大字接連便讀也相傳上虞徐條夫前輩立綱督院學時以千金購之老儒姓名不傳原本各經卷首仿經典釋文詳載傳經源流卷中上方并隨文攷據精簡不蕪使讀者略識窮經門徑由此而求之注疏津逮易入亦接人用柅之意也坊閒翻刻乃盡芟薙之僅刻旁訓則失之簡略且又譌文敗字一不斟改則誤人甚矣徐

本藏書家多有能取而重彙之亦發蒙之一助也按升庵全集  
卷二撫臺游可翁命周生太霞校刻五經旁注因得駐五華精  
舍晨夕晤語遂有此贈詩云早從芳潤嗽餘津理窟年來近道  
真瑟舍由求鏗爾對業同祖謝響然臻陶詩周生述孔懸金呂  
覽言空詔鏤石中郎跡未陳白首無聞吾獨老昭昭何用解祥  
麟游名居敬字行簡延平府南平人嘉靖壬辰進士時官雲南  
巡撫歷刑部侍郎太霞不知何名游命校刻書未必卽出游手  
今亦不傳不知視徐本奚若也卷二有酬周生贈扇上刻詩韻  
自注周名宗堯自長壽來省余韓吳庵同會周與韓皆余中表  
也未知卽太霞否

十一山山房

越城中八山謂卧龍戴陽堂火珠蛾眉白馬彭東武也後人以

黃琢益之爲九讓簷街土人以街南土阜戲呼爲第十山後有人扣土得一碑題曰第十一山則不知十爲何山也友人楊春生孝廉少居讓簷街署其書室曰第十一山房子少時爲作跋約略言之今讀志隱齋詩鈔卷三有過十一山山房哭先師金雨田先生七古一篇自注先生於諸經皆有論說尤精左氏春秋因以授璋雨田不知何名當是嘉慶中人亦不知居何處春生殆聞與之台亂後并屋宇皆爲榛蕪矣

### 寒蘭蕩

從高祖火蓮居士餘菴碑記首云自蘭亭谿壑之水建翎而下由東北入城瀦於小隱山之側俗稱潭蕩有漁梁曰何山橋山小於拳橫截水口蓋求點之故里也潭蕩之地與水俱東至是指餘右旋而住田畛細流入池如偃月左旋與潭蕩會按祁忠

惠公集越中園亭記之三藝圃云在偏門外昔爲某氏園徐文長先生所譌截出鑑湖水推開秦望山者其後陳明吾長君別築堂軒山水已爲此園有矣門與徑酷肖天鏡俗以寒蘭蕩呼之主人不受也按上天鏡園條云出南門里許爲蘭蕩水天一碧游人乘小艇過之得天鏡園園之勝以水而不盡於水也據忠惠似今之水天一色卽明天鏡園故址其地名蘭蕩故呼藝圃爲寒蘭蕩以別之後廢爲菴乾隆中爲居士所得署曰餘齋或曰潭之切音爲寒蘭寒蘭者潭也惜無他證劉子全書卷十題謝墅陸侍御草堂七律之二自注蘭蕩有張氏別業甚都又有賽蘭蕩據劉注則蘭蕩爲天鏡園張氏別業故呼陳氏園爲賽蘭蕩寒賽形近而譌非潭之切音也

侯山卽小隱山

浙江通志侯山在紹興府城南九里

一統志同嘉泰志在縣西四里

水經注山

孤立長湖中晉車騎將軍孔愉少時遁世栖迹此山後封侯又

名九里山俞卿紹興府志

卷十

古迹志二云山陰孔車騎宅在府

城西南三里晉孔愉初以討華軼功封餘不亭侯授車騎將軍

及爲會稽三年營山陰湖南侯山下數畝地爲宅草屋數間便

棄官居之山初無名以愉來居故名侯山府志此條本嘉泰志

攷晉書

卷七十八

愉本傳乃愉解組後誅茅所爲水經注以爲少時

栖迹殊誤蓋以愉惠帝末東遷會稽入新安山中改姓孫氏以

稼穡讀書爲務移其前後也俞志

卷四

山川志侯山條亦採水經

前後未檢畫之故車騎應作鎮軍車騎乃愉卒後贈官非生前

所授也九里山別在城南水經注云縣南九里有侯山亦非山

去府城三里無九里也今李志本俞引萬厯志一名小隱山

志乘山川相距里數半不足凭文家亦然如青湖集卷六德安

縣知縣李君荇墓誌銘嘉靖癸巳十一月葬於郡西南十里

亭山下小金灣之原亭山在小隱山之東南一里亦無十里

侯山云九里則亦宜云八里皆誤本舊文也

### 夕葵園孟氏

越風初編孟鳳苞字西明會稽選貢生官 一門孝友工文

章家有夕葵園杜甫孟氏詩負米夕葵外讀書秋樹根與商寶意先生鄰梨花數

本高出軒檻蓋家八字橋孟氏世有逸才初編又有孟騷字敏

度號藥山會稽貢生有筍莊詩鈔李亨特紹興府志卷五文苑

有孟士楷字孔木會稽諸生有山輝詩草暴書亭集卷四有孟

彥林詞序中云浣花詞五百餘闕彥林不知何名蓋亦有才之

士先大母孟夫人父玉屏先生諱鼈會稽諸生無子大母自江

西歸先考榮祿公訪其族人已無知者亦不知葬何所大母言及涕泣以爲大感先生及外太母齊孺人生卒日皆祀諸正室命子孫世世無違不知於西明諸公世系輩行相去若何當乞孟氏譜攷之

倪文正公與弟獻汝二書

上虞梁湖王望雲刻天香樓藏帖

卷六

有倪文正公

元璠

與弟獻

汝二書其一云今早渡揚江雍八姪聞變先歸吾亦隨發沿途未免小稽月初定可得到惟鶴棲未定母親宜一過江湖光不惡正得小許盤桓爲快也劉念翁是否初三日入里門此老真聖賢向只信爲清孤今始知其無所不有所所議吾者惟云此事心本無愧人亦其明卽不早奏聞亦無關礙人之求之原不爲此惟是其自處未免牽濡住居本宜隔別何當猶使得承慈

息卽微人言亦無以昭示子孫斯語吾甚愧之所急議更端非  
爲謝彼浮言正是惕於正論耳家下一切甚承持護爲感餘不  
多及獻汝吾弟十一月十八日仲兄鴻寶平安報其二云昨周  
和去微致所云顧三來書感弟婆心切熱在吾身上真如日行  
周天一日打旋一過此弟至性非吾可得謝也留杭卒歲已是  
變局若又暫渡復來人又必疑吾後不更歸矣又且交際荒忽  
之態恐又有別端窺揣不如徑守前說以奉母親命一面完試  
事一面埽除新舍過正月十日選吉齊歸入宅聲之於眾未爲  
不光明也此亦承母親再四熟籌又遷其說如此吾昨有字到  
劉念翁直明此意大都云在眾論鄉評於某身上事大是小差  
處洞如觀火不復塗護表白只是於義理有所未愜者不能頃  
刻卽安耳今日之舉全不是解塞人言卽此人言亦有可變也

與劉語意如此不知是否廿一日兄鴻寶按文正子無功先生  
撰公年譜云崇正九年夏四月勳臣劉孔昭疏訐府君罷歸烏  
程銜府君侵議每思所以中之以雅負時望遷延未果及領司  
成官四品例與廷推枚卜窺上意頗嚮構益急願言路無可喻  
意會誠意伯覲戎政遂以咱之出袖中彈文使越職訐奏府君  
冒封詔下吏部議覆於是同里朝士尙書姜公逢元侍郎王公  
業浩劉公宗周等及從父御史公揭辨分合之故府君亦上章  
自理烏程意阻及吏部覆行撫按覆奏烏程慮勘報之得實也  
卽擬旨登科錄二氏並載朦混顯然何待行勘於是部議冠帶  
閑住烏程票革職上從部議而封典如故明史卷二百六十五文正本  
傳云八年遷國子祭酒元璐雅負時望位漸通顯帝意嚮之深  
爲體仁所忌一日帝手書其名下閣令以履歷進體仁益恐會

誠意伯劉孔昭謀掌戎政體仁餌孔昭使攻元璐言其妻尙存而妾王冒繼配復封敗禮亂法詔下吏部核奏其同里尙書姜逢元侍郎王業浩劉宗周及其從兄元琪咸言陳氏以過被出繼娶王非妾體仁意阻會部議行撫按勘奏自擬旨云登科錄二氏並列罪迹顯然何待行勘遂落職閒住傳與譜所言符合出妻乃人倫不幸之事文正偉人何以有此孔昭受溫峻使攻訐不必辨觀公書中劉忠端所言知文正自處於理未爲至當開小人之隙未爲無因也譜又云詔於七月朔下九月朔登車南返十二月舟將抵省馳使白太夫人會欲禮佛雲栖府君乃輕舸渡固陵迎抵會城瞻諸名藍因以卒歲證之第一書則文正以陳尙依太夫人分居未定授意獻汝使白太夫人謂欲禮佛行也者迎抵會城卒歲無功爲叙者諱故隱約其辭不盡也

譜又云十年二月奉太夫人歸里五月治宅城南之羅紋十二月規模略成遂入居焉證之第二書則獻汝與公書欲公奉太夫人居杭暫歸越中而公不從令其別構新居齊歸入宅聲陳宜出之故於眾皆二月以前往返商榷無功無可置喙故略之幸公二書傳世王氏摹刻以行其事顛末可攷否則讀無功年譜至分合馳使等句不解何謂攷明史者亦無由於蛛絲馬迹之中盡得當日情事也若人海記卷上云倪鴻寶先生與同邑丁庶子進俱天啟壬戌進士選庶常嘗中秋聯句丁首唱云中秋佳節好吟詩爲倪所哂上偶問崩字何義丁曰君死曰崩倪曰先帝升遐曰崩進自慚漸與倪成隙倪少娶餘姚陳氏失歡後官尙書以妾王氏膺封誥丁遂修怨嗾誠意伯劉孔昭訐其事倪奏辨陳氏失母意遺歸外家命娶王宜封引海瑞前妻許氏

潘氏弗封封繼妻王氏爲例幸上不問倪竟以此自免歸陳氏  
實同母夫人居非遣歸者甲申末陳氏訴於朝時孔昭在事奪  
王氏改封陳氏按丁進爲萬厯己未進士非文正同年文正時  
官祭酒非尙書至十五年九月詔起兵部右侍郎明年五月十  
一日起拜戶部尙書部議冠帶閒住非自請免歸初白所記皆  
謾無功年譜小注云噤附者尙有人屢見野乘茲不及似進亦  
噤孔昭附烏程之一人野乘不攷文正科第官職初白沿其謾  
耳特所記陳氏實同母夫人居非遣歸者與公書脗合且及福  
王時陳氏上訴事足資補注明史者採取章大來對山日記云  
鴻寶先生初娶陳以他事不合復娶王王字人矣其父母欲嫁  
官人遂字倪臨遣時王氏妹矢言於眾曰姊字人有年通國皆  
知倪所娶某也姊安得往父母皆出於不意相顧愕然遂易遣

次女而先生亦無可奈何一日請封本陳氏也已緘矣王私以  
己易陳封下會親屬有洩於溫體仁者遂以妄冒封事劾之先  
生不得已以陳爲出妻朝廷亦命先生冠帶閒住後先生殉難  
京師宏光朝議卹典陳親往金陵復予陳似出齊東野人之口  
特未知無功兄弟爲陳出王出也獻汝名元瓚號朗齋年十三  
試輒冠軍文正殉難先作書急遞寄之獻汝哀國痛兄目腫聲  
啞故作好容告母曰兄扈駕從海道南幸旦夕可至預作郎鈔  
出袖中曰此據也福王立授兵部員外郎辭不赴唐王時授太  
子賓客亦遙授也丙戌母年已八十六病亟刺臂血書疏願天  
乞代母卒獻汝年亦六十三作孺子啼日夕不息廬墓三年又  
踰歲卒年六十七著有理學儒傳春秋五傳二書入羣史月自  
漢至劉宋止杜詩紹興府志等書皆有論斷文集數十卷李志入孝

行與無功皆不愧文正子弟文正新宅在今五雲門內東雙橋  
所謂衣雲閣額曰萬馬飛青者地近雷門俗呼羅門畝以雷羅  
聲轉而譌無功注田隴繡錯如羅之紋則望文生義也祁忠惠  
公越中園亭記王家莊條云入稽山門卽羅紋畝土阜隆起俗  
傳爲羅隱墳莊在於前今止餘樓居數椽矣忠惠亦沿俗說無  
論昭諫墓不在是自嘉泰志以至李府志陵墓皆無之卽使葬  
此亦當呼羅墳畝而如羅之紋亦爲舛說矣越人所傳羅隱佚  
事皆誕妄無理甚至呼隱爲意更可怪也

### 祁二綬

杜禾子先生

春生

越中金石記云祁忠惠從孫女二綬三綬俱

以福王選婚赴南京國變後撤選二綬適左軍都督府右都督  
封保安侯黃調鼎三綬爲錢謙益陷入敬謹親王府見祁氏譜

惜抱續集黃徵君傳誤以爲忠惠女且謫選婚爲立后云調鼎  
元孫言之不足信也庸接近出章有謨景船齋雜記亦云福王  
元妃黃氏早薨次卽祁彪佳女地遠謫傳皆失其實應以祁氏  
譜爲正敬謹莊親王尼堪於甲申五月以貝勒與貝子屯齊等  
追福王於蕪湖執之時統兵者爲豫通親王駐江甯謙益喪心  
無恥至陷其故君已選之妃於下陳常與鞏煇張燐然周鍾同  
僂若過墟志孀姝殊遇劉三秀爲端重定親王博洛繼福晉王  
薨於壬辰三月年四十恐附會非實事也

### 張葆生

佩文齋書畫譜

卷五十八

張爾葆字葆生松江人弱冠卽有名畫苑

寫生入能品後善山水與李長蘅董思白齊名其壻陳洪綬得  
其畫法注出山陰志按爾葆原名燦芳號二酉文恭公元朴孫

雨若副使

汝霖

次子陶菴先生

岱

仲父也萬歷戊午順天副貢

生歷官太平蘇州通判孟澤知縣揚州同知管清江船廠甲申

二月十日卒見張氏譜山陰志何以以本邑人爲松江不可解

也柳亭詩話

卷十五

云蕭山來南老呂禧老蓮婦弟也從之學畫

而變其習殆二酋女殤再娶於來耶諸家撰老蓮傳無溯其學

畫淵源與傳授門弟子者故摭書之

青湖集校語

汪青湖

應彰

青湖集

卷六

適可薛君墓誌銘云南渡時有泊平者

以參知政事扈蹕家於越始爲山陰人按宋史宰輔表南渡執

政止薛極一人字會之武進人無治平名不知青湖何据殆本

適可行狀

火珠橋

蠡城八山之火珠今人已尠知之若火珠巷有火珠橋在烏龍廟前卽今呼爲版橋者西河合集五言絕句一卷病起贈李君云火珠橋下路方備九還丹自注李住火珠橋

平陽祁忠惠別業之誤

西河合集重修平陽寺大殿募疏序云相傳其地在平水之北以水北曰陽故名平陽越王句踐嘗都之明崇正閒山陰祁中丞購之爲別業而藏書其中其後中丞殉國難山賊據爲寨別業以毀按忠惠未嘗購平陽寺爲別業寓山疏鑿以奉母也甲申自蘇撫免歸杜門不出乙酉移書至化山旋卽正命西河夙與五六兩公子游又案至寓山讀淡生堂藏書何以有此說此疏必不出西河手陶篁邨先生謂合集有僞作雜刻其中此疏亦贗鼎之一不獨墓誌傳序十餘篇也据黎洲年譜康熙丙午

與書賈入化山化鹿寺翻閱祁氏書三晝夜載十捆而出殆理  
孫兄弟移歸未盡者

### 觀蠶橋

越城雷門內有觀蠶橋不知命名之義相傳舊作官齊越王時  
每朝百官待漏於此齊集此亦臆說府城隋楊素所築拓而大  
之越王時此地尙不屬城安有是也頃讀墨莊漫錄卷五前輩云  
一郡之政觀於酒一家之政觀於蠶蓋二物若善則其他可知  
矣似橋名取此說畜菜御冬民事所亟字依說文宜作蠶隸變  
作蠶作蕡者誤也

### 鑑湖邨居

稗販卷四艮山門始自南宋吳越時呼爲保德門城外自慶豐亭  
而下謂之東鄉皆平畦廢陌風土饒沃艮維雜志云地幽境隩

喧塵之所不到陂池相屬略約四通枳徑竹籬柴扉隱現春和  
時野花錯雜綠眇絺林夏則嫩綠齊發含颺幕曦蟬鳴鳥嚶天  
然樂台秋空月曠低影墮懷袖中枯桑知風涼氣先襲家人世  
守蠶織是以邨邨富實俗無小偷冬宵伊軋之聲比戶相接樂  
土樂郊當於此屈一指焉庸按艮維雜志卽樊榭先生城東雜  
記之初名越中常禧門外自跨湖橋迤西而北有中堰湖桑清  
水間沈釀堰柯山湖塘諸邨縣亘四十里人家臨水門對青山  
稻隴瓜疇歲占二熟陂塘浩淼富鱸魚鰕居之者不知四時之  
樂若固有之而地多墳土築室匪難隙宇頗稀卜鄰不易每讀  
此條爲之神往然千巖萬壑不讓會垣勝景遐區恣人探陟耳  
食者口沫虎林自吹鄙壤所謂得哀家梨蒸食者矣

陶山游記

鄧心牧伯牙琴有陶山游記云游鳳皇山謁文清曾公墓所謂松月菴者度黃岡嶺達陶山爲貞白修煉地谿上橋曰集仙又有自陶山游雲門記云循山折入支徑達南洋宋太傅賈氏埋骨處循若耶谿任公子釣磯屹立谿上數仞仰刻篆文所謂筆倉墨池今在顯聖寺二記載雲門集及吳石倉武林耆舊集唐按王之禱紹興府志卷四山川鳳皇山在城南七里許又云秦望山在府城南四十里咸平中陸參撰法華山碑夏后氏巡狩越山方名會稽後世分而爲秦望釐而爲雲門法華其實一也又云雲門山在府城南三十里秦望南晉義熙二年中書令王獻之居此有五色雲見詔建雲門寺後析爲六曰廣孝顯聖雍熙普濟明覺今廣孝寺獨存卷六云陶晏嶺在府城東南四十四里王顧嶺北舊經陶宏景隱居於此卷八云若耶谿在府城東南三

十五里北流入鑑湖又云王右軍墨池在府城西南二十五里

蘭亭橋東

卷二

祠祀云曾文清幾墓在鳳皇山

卷二

雲門寺在

雲門山舊志云或謂雲門寺本面東主秦望而對陶晏等山如  
列屏幃會昌廢寺後止存一小殿面南未毀遂附益以爲寺非  
復舊趾而舊趾乃多犁以爲田又云顯聖寺舊名顯聖院顯德  
二年於拯迷寺石壁峰前建號看經院後有王子敬筆倉萬厯  
甲午陶望齡延湛然禪師改建於玉笥山前志所言與鄧記地  
望多不合所謂松月菴黃閣嶺集仙橋南洋任公子釣磯並不  
見於志

今利植門外五里亦有鳳皇山古墓三家相傳爲明皇后父墓  
碑漫漶彫剝無一字可識翁仲半陷入土石獸斷仆一卧厓岸  
將入水究不知誰氏所葬明時止神宗王皇后爲越人而家於

京師先世塋冢亦當在餘姚俗語無稽不足詰也据東萊文集  
卷六入越記云泛舟過南堰出門穿鑑湖支港七里獨山野橋出  
山口港漸狹又七里道樹捨舟步田閒一里許至堅密菴拜外  
大父墓菴屋纔八九閒南堰門卽今之利植獨山野橋似今之  
王家橋是文清所葬之鳳皇山宋時不知何名非一山也  
松月菴今南門外之鳳皇山

### 胡天游稚威

胡先生天游一名騃字稚威庸按元有胡天游岳州平江人著  
有傲軒吟藁一卷入四庫集部別集類又按蔡邕胡夫人墓  
表夫人生五男長曰整伯齊次曰千億叔韓次曰甯稚威次曰  
碩季叔伯次未加冠遭厲氣同時夭折叔上郡孝廉季更厯州  
郡甯舉茂才葉令京令爲議郎是稚威乃胡廣第三子甯之字

又國初西泠十子中毛先舒字稚黃一名駿字馳黃先生好奇何以名字類同古人且何取於中庸公子而與之同字耶

南疆佚史注

王窗山大令

文璋

志隱齋詩鈔

卷六

其吳芍生吉士夜話詩自注

予嫌李氏南疆釋史之妄因爲溫晒園書作注君深是之

庸按

晒園佚史爲萬石園明史稿之外編李瑤不知妄作改佚爲釋自稱勘本李書行而溫書罕知之者矣大令之注不知體例何似前向小山邑丞

元傑

索觀堅辭無有豈慮郭象之盜向秘不

敢出抑大令有錄無書或髮逆之亂小山喪其楹書不知大令有此作耶

卷八

讀漫軒隨筆答懷自注予前著左傳通證一書小

山亦云烏有

陳無波徵君

陳無波徵君名榮杰字遂南一字無波高祖世綸官郵教諭由  
蕭山遷會稽父宗器官祁陽知縣徵君寄籍應試工舉子業屢  
薦不售時人目其詩似少陵文似廬陵因自號慕陵道人侍父  
任琅璽井提舉越數年歸里毛西河仇滄柱與爲忘年交交胡  
稚威齊次風魯秋塍商寶意游匡廬涉洞庭東至仙霞南踰羅  
浮所至窮其勝爲之詩歌乾隆丙辰湖南巡撫鍾保薦博學鴻  
詞試報罷游湘中舒成龍知荆門聘修州志卒於幕中乙亥十  
一月也年六十七子鏡歸葬於越孫三人松齡字喬年一字大  
巖會稽增生永泰原名昌字永年上舍生乾隆癸丑購得  
觀菴青藤書屋居之訪山人墓墓斷碑勒石青藤枯而復生以  
藤花占科第猶邵武之榴實證登科也  
曾孫八人渭原名澧鴻原名鴻瀾字小巖續輯軒錄補遺卷三陳  
渭字樂漁號小巖山陰  
人著樂漁詩彙四卷上舍生鴻達字用儀號九巖嘉慶戊辰舉  
不知何以與此互異

人官廣東大洲場大使鴻熙號十峰會稽陳生著有藤阿文彙

吟橐四卷鴻磐號士巖歲貢生鴻章

原名鴻圖

諸生鴻燿廩貢生元

孫六人重光

原名梧

楷諸生本諸生亦儒

原名杜

府學諸生逢申

原名

樾

號安生乙酉舉人模字復生丙申進士官兩當知縣皆以能

文科第世其家據杭氏詞科掌錄鍾撫所舉十人三爲陳世賢  
祁陽生員入爲陳世龍祁陽拔貢而無陳榮杰或世賢爲徵君  
寄籍之名孫氏星衍撰傳及昌跋慕陵詩橐皆未之及俟攷惜  
辛亥館青藤書屋時與九巖丈談藝未及聞此也

鯉浦本名邢浦亦作刑浦

晉書

卷七十九

謝安傳附子炎云破上虞進及邢浦去山陰北三十

五里孫恩傳邢作刑十七史商榷

卷五十一

疑是一地邢刑形近按

此卽今之鯉浦鯉邢亦聲近而論

蕊山

烏吟募園雜詠有蕊山舍一首蓋本吳志孫綝傳注引文士傳  
曰華融字德韃廣陵江都人祖父避亂居山陰蕊山下時皇象  
亦寓居山陰吳郡張溫來就象學欲得所舍或告溫曰蕊山下  
有華德毅者雖年少有令志可舍也溫遂止融家朝夕談講今  
不知此山所在郡縣志古蹟亦未收人遂詫爲異耳徐文長三  
集秦望山東南下折有峰紫鐵色錯豎似花蕊土人呼雄鵝突  
子贈名花蕊峰則峰爲天池所名不得以之當蕊山也太平廣  
記卷三百八十二韓確條引酉陽雜俎在山陰縣顧樹邨知堰顧樹或  
卽今界樹之譌知堰則越人無知之者矣

岳碑遺石

王之賓重修紹興府志

卷三

署廨志越望亭在卧龍山頭亭側有

諭飛勅碑文字剝落不可識碑陰刻無名氏滿江紅詞拂拭殘  
碑諭飛勅依稀堪讀慨當時依飛何重後來何酷果是功成身  
合死可憐事往言難贖最無辜堪恨更堪憐風波獄豈不惜中  
原蹙豈不念蒙塵辱想北狩南轅此身何屬千載休談南渡錯  
康王自怕中原復歎區區姦檜亦何能逢君欲知府蕭良幹題  
八景六曰岳碑遺石唐按此文衡山和鄂王詞見堅瓠乙集卷三  
往作去蒙塵作微欽想北狩南轅作但微欽既返康王作當時  
姦作一君作其

### 水則

聽雨軒雜記三江開東水際立一碑面刻金木水火土五字背  
刻淺母至足深母至肩八字例以水及金字則二十八洞齊開  
至木字則開二十一洞以下依次減其七至土字則齊閉矣唐

按俞卿重修紹興府志卷十則云至木字脚開十六洞水字脚開八洞夏至火字頭築冬至土字頭築綠蘿山莊詩集卷二觀三江放閘詩自注引三江現行事宜則云夏至水字頭築

筆獵

柳亭詩話卷十云陶筇厂石簣先生之裔著有筆獵四書攷紀

元本末十八卷耐久集席按陶氏譜筇厂名及申字式南歲貢

生允光元孫有四書博徵百二十卷殆卽柳亭所謂四書攷又有字學類正筆獵耐久集二種無之太白留別廣陵諸公晚節覺此疏獵精草太元近人有四書獵精以此不知親筇厂書若何

襍屑紅

天香樓偶得披帛條古今注云女人披帛古無其制開元中詔

令二十七世婦及寶林御女良人等尋常宴參侍令披帛至今  
然矣按此則今時畫工凡畫唐明皇以前女人用披帛者皆失  
款矣且開元之制亦但施之內官今世俗婚娶不論男婦皆披  
絳帛亦流傳之失耳庸按今越中童生初入學鼓樂迎送投謁  
親族欄衫之上必披絳帛呼曰鐔肩紅不知防於何時婚時亦  
有用之者婦則否據虹升此條則亦非法之服不用可也

### 赤金柬字

寄園寄所寄

卷一

囊底寄技巧董潯陽

份

與嚴嵩同朝每過嵩輒

用赤金鑲姓名縫紅綾作束嵩以爲尊敬之也閹人利其金每

一傳報卽取金去後嵩敗董獨免交通律

刑記

汪曰楨南潯志

餘亦引之云按此事蓋惡董者飾言之當嵩柄國時朝士孰不  
投刺安得便指爲交通耶倘金字偶有存留則交通之律轉難

免矣智者似必不出此庸按越人以此爲丁方軒都轉事和珅時所爲和盛時投刺者無慮萬億不減分宜方軒何獨爲此或卽潯陽事而附會爲丁荔牆所謂惡之者飾言之近是

### 越醫

越中自昔多名醫代有傳緒赭寇亂後不特世醫歇絕崛起者更無人一有危病率以性命付之庸妄可憫也竹香齋詩鈔

卷四

有論醫絕句八首題潘浣心小照自云可備越中故實云劍俠

歸來作聖儒梨洲一傳墨痕粗叢叢魚復江邊石擺出新方八

陣圖

自注景岳類經梨洲此之周雲淵易算並歎爲越中絕學

多少遺民學寶醫講山方幅

鼓隆奇秀才品第纔三等欲問當年趙養葵

甬中高旦中得趙養葵之傳一至杭

而講山之門可羅雀然梨洲謂君醫正堪三等耳

亭後難逢載席船螺山社鼓自年年

紙灰一撮風吹盡早入寒齋記異編

倪涵初所醫多貧家舟中必載席遇破席易之結茅

庵螺山以醫之所得為建橋之用蓋三年而橋成今螺山大橋是也歿後遂為螺山土地神事載東武山人集又傳紫霞記其佚事有孕婦寒夜求醫明日發其所贈則紙錢灰也初居亭後村吳下淵源祖一王翩翩薛葉

衍披長節庵瑣屑嘉言僻妙得心精仲景方王子接遺書市上葉天士刻之

君平今若何橘林叢雜杏林多上池涸盡曾無水翻笑龍門史

筆謗只說磨刀井水甘丹崖破宅更誰諳砂鍋滿煮枇杷葉寫

出風流范左南主丹崖住磨刀井好用重劑當時有王砂錫之名其用枇杷葉講炮製之法尤為人所厭苦余

友范蕪洲為之立傳墨杓香生樛木鄰竹絲門外雪痕深傳來八脈頻湖

學點墨研朱自古今王培公與丹崖同時所居在墨杓樓東能仁寺後能仁寺即呂氏樛木園也於醫家

書最傳通其與人言必曰某書第幾卷第幾頁第幾行當時調病者每傳其竹絲門今竹絲門尚在木瓜橋下晚

浴浴五十今成六十翁珍重刀圭遺法在莫將秋水澹芙蓉按

傳所記涵初事今越人移之任鳳波任亦嘉道中名醫也王培

公康熙中人為子友小巖翰香坤生世祖其父七巖先生為先

師汪望之先生從姊夫以諸生傳父學道光中名重一時小巖嗣其業年未中壽卒翰香殉髮逆難坤生困小試僅博一倂舞生亂後改習度支易名福坦以府經需次吳門己丑王氏醫學無傳者竹絲門亦燬於逆燹矣

### 厲布衣

廣東新語

卷十

宋有厲布衣者善相墳地今廣州故家大族其

始祖二世三世墳多厲布衣所定穴予宗有其二焉諺曰族有

布衣墳繁昌必有聞

肅

按布衣名伯韶通俗編

卷三

引水東曰

記廣東人相傳宋嘉定中有厲布衣者自江右來精地理之學名傾一時廣州林某者宋元富家永樂中衰術者言其祖穴向稍偏所致因發地得石書云布衣厲伯韶爲林某葬此後學淺識不許輕改遂仍揜之今林氏頗復振廣人口音稱賴布衣云

四庫全書總目子部術數類催官篇提要則云賴文俊字太

素處州人自號布衣子故世稱曰賴布衣所著有紹興大地鈴

及三十六鈴據綠蘿山莊詩集卷二十九東湖雜詩之五自注白鹿

山在縣東南二十九里犬亭之南厲布衣箝詩鹿峰頓起遲接

天峰頓卓笏分支流此西施鈴詩三字異注於旁金水踪則厲賴字通籍當作

鈴爲是今越人相傳布衣來越賣泥紗帽水澄巷劉氏購其一

帽墜地而鈴詩出卽小亭山葬孝子遂安者也三岡識略卷三云

我家自南渡以來始祖官一公墓形家謂之金鈎釣月相傳江

西賴布衣大有所作布衣名字有文俊伯韶大有太素之殊里

籍又有廣東江西處州之異厲賴古音同論語則以爲厲己也

釋文鄭讀賴漢書地理志南陽郡隨縣厲鄉故厲國也師古云

厲讀曰賴王船山春秋稗疏辨厲卽賴國是卽本之師古顧復

初春秋大事表有春秋時厲賴爲一國論云云通典乃以厲賴並列兩國失之

徐天池白描錢帖冊子

徐天池先生畫多水墨大幅淋漓濡染若不經意以故廣鼎最多最難審定白描小冊未之見也弇山詩鈔卷十題田水月山人錢帖冊子題下自注云山人自敘云錢之名號若形若文字若隱語若象物若改年蓋自葛天軒輟尊盧氏以至於今所呼曰板兒棍兒者殆百紙不可了尤瑣者新莽隋唐閒志也語云財堅當行勢堅奴僮叶語若墮甌僧然與貨殖篇十則下之百則役之及子輿氏所稱小役大弱役強皆天也之旨何殊哉終身爲魚而求避涇無之也蓋有之矣微矣哉之乎博徒譜錢帖四十某增十有八帖與酒徒共之其事則焦革畢卓其文則譚

末子曰其義則某糟粕之矣詩後又注云此冊爲青藤先生墨迹其帖自半錢遞至萬萬錢止計帖五十有八每帖用素紙寬三寸許長三之雜引周秦以來史策洎唐宋名人詩句涉錢文者仿李龍眠白描繪爲故實筆法蒼秀氣韻生動洵稱妙品予見先生畫多矣要皆長槍大劒亂頭粗服如崔灤梁三丈乃其當行今不滿尺幅之中復精妙若此又一奇也其空白處卽書史策語及詩句字雜眞行疏密欹整不拘繩墨雖非先生極意之筆要不掩其本色前有敘例各一紙紙雅青色寬長如右方訖不著姓氏閒用田水月小印而已吾鄉胡君大山寶而藏之云其先世得自蕪湖己未長夏予客京師寓興邑之東驛與大山比舍因出以示余予囊空羞澀獨醒寡歡見之不勝朵頤遂題七言長句四韻且跋而歸之乾隆四年六月中伏日庚子魚

鳩老人書於順天大興縣廨寓据天池敘及王注似是馬弔馬  
始於空一文今呼紙牌蓋戲具也今去己未一百四十六年胡  
終於萬萬貫氏藏此冊否

孟次微監州

癸酉秋從坊肆得備菴集一冊備菴北游集一冊版心魚尾刻  
孟次微集二者蓋其子目不分卷數不知尙有何集文若干篇  
無可攷可喟也卷首毛西河敘有云今次微集中如傳記序者  
猶在也今備菴集爲傳誌行述北游集爲書十九首則記序別  
自爲集可知次微名遠會稽人子塞廣文稱舜仲子前諸生馮  
山公解春集有答孟次遠問喪服書首云伯通足下按伯通名  
口字仲嘉以字行次微之兄亦諸生伯通以不良死抱經刻馮  
集在乾隆丙申前故諱而署遠名不以次微易伯通故存其隙

以俟後人按討也與谷霖蒼書云遠今年三十矣困棘闈者四  
初寄籍於北再試輒於南今又自南而北矣二親垂白時在癸  
卯則次微當生於崇正甲戌甲申止十一歲似非前明諸生也  
初上蔚州書云九試棘闈不見納一赴 殿陛不見用不得已  
就試於吏部而僅得一不可獲之虛職者又十七八年據西河  
合集曼殊別誌書磚注孟監州遠記似考職州判也次微少與  
朱朗詣晉叔敬身友聲董子搢玉兄弟交西河敘稱其與張用  
賓宗觀賂叔夜姜武孫齊名爲越郡四才子其文長於持論頗  
近東坡而敘事亦得龍門神理言錢穀見耗費之源言民情悉  
困苦之患言兵事戰勝攻取得出奇制勝之略言吏治通達諳  
練工激濁揚清之權張彥之敘極推之不虛也用賓早死於兵  
詩文不傳叔夜詩勝於文次微文勝於詩武孫詩文上掩天池

今皆魁行世次微此二集評點卽出武孫姚春木文錄朱蘭坡  
文鈔朱伏園古文約選僅收其略惜哉四子遵軾遵轍字穎季  
亦有才居春波橋與姜氏老衙鄰道咸閒有孟澄江先生漣老  
於章縫又王子孝廉沉不知是次微族人否當時惜不一詢之  
傭菴抱才不遇畢生游歷集中可攷者順治辛丑爲學使谷應  
泰所識拔入國子監客李良棟家康熙壬寅始援例蓋

登極臨雍考職後也旋丁母憂□□再入京乙巳八月交全州  
謝良琦丙午謝敘其文夏姜武孫再敘戊申冬歸省有再上台  
肥書己酉五月訪駱復旦於崇仁縣署七月應順天鄉試辛亥  
上張蕢山萬言書丁巳入都戊午客廣平張思恭署秋試被落  
十月西河敘其集上宋蓼天書又上魏蔚州書者二未豫鴻博  
之薦有上金棟存副憲谿書以崔奇事羈訊上谷者一年庚申

八月生于北溟書王戊張彥之敘其集甲子八月浙江鄉試十九日丁子塞先生憂庚午冬關西胡大定與其子穎季交敘備菴集王申何雍南聚敘之不知後以何年卒壬申年已五十九矣

明史無徐人龍傳

西河台集言其充明史館纂修時分纂章正宸傳其實集中列朝備傳自張瑄至進芳十六人皆分撰成宏兩朝列傳彙也又言徐秉義撰徐人龍傳王士正撰魏驥傳萬言撰蕭山徐訓導妻李氏傳今明史彙與

欽定明史皆無人龍傳殆石園爲橫雲山人定彙時以侍郎曾應端重莊親王博洛溲紹之聘故去之

皋埠可作高步亦可作皋部鵝鼻可作何避亦可作娥避

漓渚可作籬渚

雲谿友議

卷四

云在越每經游蘭亭高步禹跡石帆之絕境今五

雲門外皋埠小皋埠無作高步者廣韻皋高也明堂位天子皋

門注皋之言高也釋名高祖高皋也最在上皋韜諸下也是皋

高二字古通埠俗字昌黎孔戣墓誌蕃舶至泊步有下碇之稅

柳州鐵爐步志江之滸凡舟可縻而上下者曰步字正作步章

大來偶陽雜錄作皋部柳亭詩話

卷五

鵝鼻在秦望東南

應作何西南

允避地於此或何避之譌也一云句踐棲於會稽置宮娥於山

頂故名娥避顏魯公集康使君

希銳

神道碑銘天寶四載七月

四日寔於山陰縣籬渚邨之先塋則今之漓渚應當作籬又云

君之先君

國安

至

姪璵男

南華四代進士登甲科者七人而府

縣志選舉皆無之康氏爲會稽盛門今無知者可唏也

瓠魚

吾鄉昌安門外銅槃湖四五月閒出瓠魚最爲鮮美惜失水易

餒城市至者頗少以淪麪尤佳或取雞鴨卵鷺之弇山詩鈔

三瓠魚示寶意五律云白小猶非小看來色頗同如絲不成縷

似雪未曾融剝膾刀難下斟羹飭易空季鷹鄉思切不及待秋

風中四句形容惟妙惟肖自注朱竹垞詩作鮓見暴書亭集卷四弇山首句本

之按爾雅釋魚鮓當鮓注海魚也似鰠而大鱗今江東呼其最

大長三四尺者爲當鮓又類篇曰出有時吳人以爲珍卽今鮓

魚然則鮓非吾鄉所產者蓋此魚常以四五月閒應瓠而至過

此則無當以此得名予竟以瓠易之近人越諺卷中作鮓音護按

爾雅釋魚鮓大鮓注鮓似鮓而大白色本草圖經鮓口腹俱大

者名鮓類篇鮓或作鮓則仍竹垞說弇山詩注雖以己意命名

水族後起日多不見爾雅者固不妨自我作古卽以瓠名此魚無不可也

脰

越人以刀削物如瓜梨葶薺之類皆呼爲脰之去聲按此字當作脰漢書董仲舒傳民日削月脰注謂轉蹇踈也正韻脰減也夏綠切平聲鄉音譌轉遂爲去聲耳

棧

越人歲晚畜鵝以精穀餵之極肥鵝以祀神呼爲棧鵝棧字不知所出西河越語肯繫錄三樵越言釋皆無之按清異錄趙宗儒在翰林時問中使言今日早饌玉尖麪用消熊棧鹿爲肉餽上甚嗜之問其形製蓋人間出尖饅頭也又問消棧之說曰熊之極肥大者曰鹿以倍料精養者曰棧

謝謏食譜亦有白消熊

是北宋時

已有此呼棧字甚古游宦紀聞

卷三

先於山路多植木如牛羊棧

又

卷九

木而輕薄者曰棧公羊哀四年傳勝國之社奄其上而棧

其下管子小問篇傳馬棧甚難莊子馬蹄篇編之以阜棧畜鵝

者必以竹棚簷植使闇伏不見天日故有此呼耳紀文達姑妄

言之

卷一

云明重消熊棧鹿棧鹿當是以棧飼養今尙重之消熊

則不知爲何物雖極富貴家問此名亦云未曉文達博涉豈不

見清異錄食譜殆偶忘耳寄園寄所寄

卷六

引玉堂叢語云嚴相

大宗時貴谿爲首揆俱在直欲置酒延貴谿者數矣多不許閒

許至前一日而後辭則所徵集方物紅羊雅狸消熊棧鹿之類

俱付之烏有文達謂明重消熊棧鹿當卽指此條若釋名

卷二

釋飲食消膏而加菹其中亦以消酒也

卷四

釋車棧車棧靖也麻靖

物之車也二字皆別一義不得援以釋此近人越諺作牋雞牋

鵝云歲將終豫聞綫雞與鵝暗處畜肥作牲攷集韻牋音棧或作殘豢羊屋也則正字通已辨之曰凡豢養六畜之所方俗異名羊必从羊則馬必作驢豕必作彘亦太近陋牋字不如棧字之古也

揉渡船

越中野渡方舟中流引繩兩端分繫於岸渡者曳繩出水置舟中欲東則舟掣而東西亦如之呼曰揉渡船而字不知所本按揉音柔集韻以手撻也玉篇汝又切廣韻人九切則上聲蘇文忠公新灘阻風詩孤舟倦鷁軋短纜困牽揉卽此揉字不得云俗也近人越諺卷中作穀注音紂說文而又有秣稻頭一條注秣揉其實皆應作揉爲是說文穀懸物穀擊也音同義異

安昌可作安滄

慕陵詩臺卷上贈婁巨冶云君家安滄墟余家鑑湖曲是安昌可作安滄今人罕用之者

### 山陰徐志

李元仲世熊甯化志分土地人民政事爲三大綱各類爲目如

封域疆界之類從土地學校禮儀之類從政事官師選舉之類

從人民與它志異蓋本唐樞湖州府志入地理類存目三嘉慶辛

未山陰縣知縣徐元梅重修山陰志又本之元仲最爲謹嚴王

惺齋元啟濟甯圖記則分民與人爲二凡四大綱徐天池爲張

文恭修會稽縣志十六卷分爲地書治書戶書禮書四門寒支初集

卷七有邑志凡例八條

### 吳荔平

吳荔平中憲字履卓江都人以諸生入國學工詩詞駢體文後

爲散文亦古淡尤精樂律著有樂律全書樂府學句譜略詞調  
今存錄兩漢賁臣攷盤林談苑諸皆散佚未梓道光乙酉後絕  
意科舉自號海蓮居士後官山陰縣丞今所傳文止伯曾王父  
廉訪公山水畫幀書後爲敝刺投行馬啟清涼山翠微亭銘海  
藏菴記四篇見廣陵思古編卷九

宇泰閣

陸放翁七律有紹興辛未至丙子六年間予年方壯每遇重九  
多與一時名士登高於戴山宇泰閣距開禧丁卯六十年憂患  
契闊何所不有追數同游諸公乃無一人在者而予猶強健慘  
愴不能已賦詩識之云故里登高接箇游卽今不計幾番秋一  
樽尙與菊花醉萬事不禁江水流薄命雖多死閭巷逢時亦有  
至公侯若論耄歲朱顏在窮達皆當輸一籌今越人登高多至

龍山望海亭鮮至戴山者宇泰閣不知今當何地府縣志皆不言或書院天鏡樓故址耶

### 水陸

水陸道場相傳起於梁武誌公盛於唐宋按太平廣記卷七許君條引錄異記云請作水陸大醮普告山水萬靈得三官舉名可以證道許君依教修之遂成道果自此水陸醮法傳於人間許君卽真君是晉時已有不始誌公范文正公有水陸齋薦祖先之文東坡集卷二中元祐六年爲小本作法雲寺水陸法像贊十六首其引亦云梁武始作水陸道場今刻入蓮池大師水陸儀軌卷末嘉祐雜志云謝師直說北都李昭亮相爲寵嬖二夫人作水陸道場瀛洲店安張三郎處主位李之祖父在賓位焚香拜跪不勝其勞閑窗括異志云德藏寺有水陸齋壇往歲

富民沈忠建每設齋施主虔誠則茶現瑞花據此則水陸道場七晝夜皆以主人隨僧拜跪爲古法今人或以親串與幼稚代之施主不虔誠而望緇流說法解饑豈有益逝者乎

借僭

越俗嫁女以資遣繁富相競然不無假借至有以私行移還見薄於尊章者然古已有之不獨士庶家也嘉祐雜志云曹僧太尉長秋母弟張貂相耆之坦牀始成婚資妝甚盛請衣帳者增二十緡三十後盡斂持去訊之云本房卧製未辦此皆假借來推延五六年竟不致一物則知宋時戚里猶然僧卽世俗所謂曹國舅者光憲太后之弟武惠孫也老學庵筆記卷四云僧官至中書令官制行換開府儀同三司封濟陽郡王薨追封沂王安在其爲仙哉

風月無邊

越人好傳闌語如云徐天池游西湖題某扁曰更二詰之曰風月無邊也按宋稗類鈔卷二云賈似道後樂園中山之坳曰無邊風月蓋本朱子六先生畫像贊濂谿先生一首云風月無邊庭草交翠天池放誕時或有之好事者率取不經之說無賴之事移而屬之誣矣說文解字風从虫凡聲虫卽虺之古文六書正譌謂卽蟲字省文謬今作更字書無之眞無稽也史記蘇秦列傳班書東方朔傳有識哉堅瓠癸集卷四引葵軒雜記唐伯虎支題鶴灘集作錢題妓湘英扁云風月無邊見者皆贊美祝枝山見之曰此謫汝輩爲更二也則此語未知是錢是唐然皆在天池前

求好壻不思其姓氏

桐陰清話

卷五

云王笠舫大令年十七應童子試邑宰王韞渠驚

賞其文拔第一欲妻以愛女屬學官爲執柯曰此生詩文佳而字不佳公何愛之甚也宰曰生書法逼真王字何云不佳曰正爲其王字不佳耳宰始悟大笑蓮當日宰眞愛才然何至憤憤如是子曰此事古亦有之太平廣記卷二百四十二引紀聞有二條唐

張守信爲餘杭太守善富陽尉張瑤使錄事參軍張遇達意將

妻以女吉期有日爲女具衣裝保母問之曰女壻姓張不知主

君之女何姓守信乃悟雒縣令李逢年謂益府戶曹李睨求妻

此都官僚女之與妹縱再醮者亦可逢年以兵曹李札名家妹

甚美曾適元民

應是氏之譌

莫夫尋卒資裝亦厚從婢且二十人逢

年許之令報札札自造謝逢年喜未曙興嚴飾步階除獨言曰

李札門地若斯妹雖遠人年幼且美家又富貴何幸如之言再

三忽驚歎李睨誤人所論親爲復何姓策馬到府李睨進曰君

思札妹爲復何姓覲驚而退過札曰吾大誤但知求好婿都不  
思其姓氏札大驚惋守信聞保母言而悟逢年覲札三人眞憤  
憤矣倘聞學官廋語未必驚也

### 竿屋

竿字說文所無字彙作旬切音薦屋斜用竿庸按字正當作薦  
竿俗字也十七史商榷卷六南齊書王敬則傳齊臺建高帝將  
受禪材官薦易殿柱薦字似可疑然今吳下俗語尙有之他無  
所見薦者謂柱將損壞欲易之而惜費不肯改作以他木旁承  
之乃易去其柱諺目爲偷梁換柱札璞卷三薦柱條亦引敬則傳  
案工欲換柱先承以他木而薦其下使高於舊柱則舊柱方可  
抽去薦猶藉也

### 張厚齋集四書文

咸豐三年紹郡在籍紳士沈墨莊王蓉坡何蔽民奉

旨協同地方官辦捐輸設籌防局宗滌甫謝方齋及杜晴佳孫  
痿梅魯寅寶周益齋趙峻明章譽甫金桐谿胡小海等趨襄其  
事不協輿情營私殖賄謗言四起君子悲之集四書一首以示  
儆其辭曰使人不以道是罔民也甚矣今日之事君事也孳孳  
爲利者不以其道是誰之過歟詩曰率土之濱莫非王臣憂民  
之憂者民亦憂其憂義也於此有人焉以君命將之放於利而  
行此亦妄人也已矣當今之時兵甲不多貨財不聚必不得已  
取之於民也有司莫以告如之何則可不如鄉人之善者使之  
主事求之有道曰所以勸大臣也所以勸士也庶人不傳贊爲  
臣或勉強而行之非其道也有王命其三人墨氏執中無權國  
人皆曰賢勿聽國人皆曰不可勿聽自以爲是惡得無罪抑王

居移氣養移體然且至或去或不去如何喻於義喻於利吾從  
衆無可無不可三子者不同道其趨一也爲人也自爲也大夫  
一位繆公曰某在斯某在斯吾未嘗不得見也三子者之言何  
如左右二者令尹曰盍去諸盍去諸非吾所能及也三子者出  
斯可矣庶人在官者五六人六七人自西自東自南自北孰後  
倦焉孰先傳焉召之不至執之而已矣匹而爲有之三子告其  
次降一等亦無王命其在宗老而無子致爲臣而歸如有用我  
者以小易大勢不行也委而去之何爲是栖栖者與方叔攻乎  
異端有故而去如有復我者絕長補短力不足也不得吾心惡  
用是駢駢者爲哉夫如是識其不可斯速已矣雖然仕者盡臣  
道宜也不仕無義又其次也有人於此拔乎其萃如其自視欲  
然序爵請學稼兄弟怡怡可以爲難矣便辟善柔便佞爲機變

之巧者鄉人皆惡之有人於此苗而不秀觀其色赧赧然摩頂  
實若虛兄弟既翕斯已而已矣巧言令色足恭從大夫之後國  
人皆賤之魯人同乎流俗合乎汙世不獲乎上愉愉如也不信  
乎朋友闇闇如也人役也周人同而不和驕而不泰近之則不  
孫行行如也遠之則怨皇皇如也小人哉趙孟必求龍斷遂有  
南陽苟完矣鑽穴隙踰牆無不爲矣是豈人之情也哉章子父  
母俱存兄弟無故一樂也脅肩諂笑無不爲矣是亦不可以已  
乎在國曰市井之臣屢而不征法而不屢多取之而不爲虐放  
之於桐在野曰草莽之臣五十而貢七十而助左右望而罔市  
利而注諸海噫斗筭之人何足算也若是者爾爲爾我爲我朝  
暮見或遠或近亦各言其志也然則有同與曰有四十五十焉  
知來者以羨補不足巍巍乎初命再命子爲士父爲大夫於己

取之三分一百市買不二枉尺直尋堂堂乎在位在職前以士  
後以大夫若固有之乃若其情所同也無以異也由君子觀之  
越人七年之內因之以饑饉加之以師旅貧與賤無有乎爾民  
之憔悴久矣而可以貨取乎斯人也嚶嚶然曰此莫非王事羣  
居終日放僻邪侈懷利以相接無羞惡之心乞人不屑也則不  
敬莫大乎是是不待教而誅者也越絕老人評曰用古如自己  
出妙在起伏開合提頓收束純乎古文局中諸公性情心術聲  
音笑貌一一如繪真看盡魚龍戲矣吁鼓鐘于宮聲聞于外言  
之者無罪聞之者足戒有心人當哭勿笑當懼勿恨當羞汗交  
并勿麻木不仁也按厚齋爲鵲塘先生次子負才而盲於目辛  
酉之亂罵賊被戕生平游戲之作甚夥亂後不傳得此可見一  
斑也

陶書倉室張宜人

陶堰陶氏宗譜

卷八

潢字書倉天啟丁卯副貢生官贛州通判遷

雲南永甯府同知配張爲尼乳母一子櫛因萬里負骸歸故錄

庸

按書倉遠官天末當在永厯未入緬之前張宜人爲尼當以

國亡夫歿故乳母子萬里負骸歸葬更不可多得柳州云百越  
秦秦羈鬼相望有子而孝獨歸歿鄉書倉側室一子早卒繼弟  
清子樞當在歸越後而負骸者獨出於乳母之子較襄陽趙丞  
尤幸故譜破格錄之

灰竈頭

陶堰陶氏宗譜

卷十

隱德傳陶篁邨撰思聖字理公號存軒徒

居蘭亭山多青石罔識所用公得宏景術作竈燒之成灰郡之

築室者咸資其利

庸

按理公所居今名灰竈頭其後人猶業此

郡人設輒灰肆者多購諸竈邨氓閒有自往市負多則由筏泛谿而下陶氏世擅其利然莫有知初始之爲存軒者傳見泊鷗山莊文集坊肆未行故節錄於此

綵旗聯語

越俗童生入泮迎送日富家多張五色旗幟於輿前上多諛語甚有繡者蓬當問於書有徵乎曰古無之今它府亦未有越俗不知何昉說部短書亦鮮記載惟尺牘新鈔卷五孫宏祖答馮茂遠賀兒入學云綵貺殷勤誼不能辭爰題二幅范文正公做秀才便以天下爲任向文簡公耐官職豈爲此舉自多於迎日列之馬首如佩長者誨言耳據此牘則禾郡亦有之第賀者僅貺綵聯語自題且入學者騎而不輿與越俗稍異越人惟武生騎馬孫聯大言不慚文公二字且複見越人語多頌諛第祝其秋

賦春闈聯捷耳

魯謙菴通政

少時居白衙衙鄰有魯先生會稽老諸生也年遠忘其名其先  
世科第甚盛門多扁榜半爲流丐栖止炊煙熏暗不可辨識歲  
月名字辛酉亂後皆亡之矣謙菴通政名超字文遠隸大興諸  
生順治庚子副榜貢生起家中書舍人康熙甲辰任蘇州海防  
同知辛亥移鎮江船政同知擢松江知府舉卓異者再巡撫湯  
文正薦廉能第一建扶風書院培植後進三岡識略卷九謙菴  
接引後進風流文擢惠潮嘉道潮有絕戶虛丁久爲民累超豁  
采士氣爲之一變除三十餘戶甲戌水漲超晝夜爲民築隄至今名魯公隄歲饑  
守令議發積貯平糶未敢擅動超力任之果報可丁卯三月升  
河南按察使調廣東戊寅六月晉廣東布政使益勵清操茸珠

江義學延宿學以教士粵東兵饟例向用錢適錢滯兵苦虧折  
強市民物民復苦之超請全給白金兵民均便

特旨擢右通政使詳通志刻有古文合鈔余所有止三冊未睹

其全也吳詩集覽卷七魯謙菴使君以雲閒山人陸天乙所畫

虞山圖索詩得二十七韻靳注未詳故復錄此蓋參顏氏尺牘

姓氏攷己未六月十八日國史王度昭傳康熙四十年八月

疏劾廣東巡撫鵬勅藩司魯超虧空

超未任之時署印者糧道張天覺今超病故而天覺復署有彼

此庇護擔承之弊是超卒於辛巳之前通政未任也其虧空鵬

同奏力辨被

誣匿所詳矣

觀巷金氏

越中前觀巷金氏爲前明巨戴廣宇鱗比門有扁曰文宗柱史

者以太常官應髮逆後歸姚某西河合集金子歿詩集序大父

京兆公外大父馬少參公皆有文名母大君靜因集名遂閒堂

舅氏馬玉超詩類隨州弟子藏進士工詩肩按京兆名蘭官太常卿少參名維陞字芝嶠萬厯己未進士官江西參議京兆子三樞字伯星機字仲星權字季星樞子烺機子炯卽子焄煜卽子藏煜子埴字苑蓀一字小郊自署會稽口門伯星於崇正壬午大災與祁忠惠同辦賑城中乃伯星主之活人無數今越人無知者遑論遂間堂集此科第第宅二表之所以作也

西河又有沈肯齋

允范

典試江南序予思丈夫生不能爲宰相

得爲主文官幸矣手持衡尺目眊寔海取斯文而升降之如鈇之程材而權之宰物斯已快矣況江南人文所歸也春山揆玉無非精良且得失以實一洗從前倒載回黃反綠之說何其能歟又云肯齋大父以萬厯丁酉從應天校國子入解而其外王父姜大宗伯則萬厯甲子爲江南主文官時肯齋彌月未命名

也宗伯名之庸按大父名綰萬歷應作天啟江南應作南畿肯齋弟華范字肩吾此亦今人所罕知者以老衡姜氏皆中落也

### 大小茹

西河合集茹大來詩序山陰二茹子皆以古今文詩詞名能於人又云小茹子以今文取科第見矣庸按大茹名鄂侯順治丙戌舉人小茹子名鉉字係蒼號古越外樵順治戊子舉人康熙甲辰進士官廣東知縣與序中宦游儋耳句合鉉著有王會新編一百四十五卷未見

### 拾草寫淨

王弇山試鴻博日徐笠山以不工排律弇山取已棄示之令其運化徐竟錄之以雷同爲考官奏參徐妄供試日拾得詩藁不知何來因錄之部議亦知其妄從寬議弇山補官日罰俸一年

徐革職庸按五代會要三禮劉瑩李說李守文明算宋延美等五人所試判語皆同尋勘狀稱晚遇試偶拾得判草寫淨實不知判語不合是一般者可與徐事作對劉宋等稱實不知判語不合是一般者可謂遁辭然尙可諉爲草茅新進不知場屋體裁若應博學鴻詞之試而山雞舞鏡七言十二韻便至曳白敢搜友人之作爲己有絕不暇計及雷同有議處之法豈康熙己未諸公所有乎不若沈果堂以奏賦至夜半不及成詩而出之爲愈也然則嘉慶咸豐初法祭酒張文貞之兩請開科爲部臣所駁人皆惜之吾意如請開行試時不知更有何笑柄矣

茹三樵

越縵堂文集中有 國朝儒林論中云吾鄉茹三樵氏樸學孤紹而浮湛冗員聲域家術其子尙書公頗魁學術早冠廷對晚

長六卿今越人知古香大司馬而不知有賢父也又云山陽丁  
孝廉柘唐有子爲部郎予向求其父書牖不能答亦終不予觀  
其意若甚諱之其人固翰林出身者也讀者頗以農部言爲過  
予曰固也三樵先生入 國史循吏傳未爲無聞特越人尠道

之者其易學十書曰周易小義二卷易象攷證 四卷易講會

籤一卷讀易日札一卷 光緒丁亥十月越樓重訂 周易二閫記序無此一種 周易二閫記

三卷兩孚益記一卷八卦方位守傳一卷大衍一說一卷周易

象攷一卷 內有辭攷占攷 又有尙書古訓一卷禹貢未定稟一卷讀春

秋劄記 卷越言釋二卷竹香齋古文二卷竹香齋詩鈔二卷

和茶煙閣體物詞一卷可謂富矣而尙書行述乃云先大父著

有周易小義易象攷證籤會籤讀易日札周易二閫記兩孚益

記八卦方位守傳尙書未定稟竹香齋古文經府君以手校付

梓書名脫誤不完豈刻成後諸孫束之高閣不一取視撰尙書  
行述時任聽門客塗抹讀者不疑其有誤如錢金粟撰儒林紀  
事亦但云治周易有周易二間記大衍守傳易證籤易小義又  
有尙書襍記讀春秋劄記言之不詳校者欲取尙書行述以訂  
正之將沿譌襲謬異日何以爲郡邑志張本乎奚怪人之不知  
也柘唐癸卯冬刻頤志齋四譜四卷前有未刻書目云周易解  
故一卷怡志堂文初編卷三有禹貢錐指正誤一卷禹貢集釋  
一卷毛鄭詩釋四卷以下卽六藝詩攷補注二卷詩攷補遺一  
卷重編鄭氏詩譜一卷後改鄭氏詩譜攷儀禮釋注二卷周禮  
釋注二卷禮記釋注四卷佚禮抉微二卷論語孔注證僞四卷  
孝經徵文一卷說文舉隅一卷柘唐睭錄二卷諸子粹言一卷  
諸史粹言一卷楚辭天問箋一卷枚陳合集二卷山陽詩徵二

十四卷頤志齋文集十卷頤志齋詩集二卷合之四譜凡二十

三種

光緒庚寅六月廿八申報載揚州人接輯國朝先輩著述彙刊叢書啟有焦氏易林釋文投壺攷原二種則拓唐

著述之未刻者多矣而頤伯前輩

壽昌

甲辰鄉試硃卷履歷徵文脫文字

詩文集作十六卷不言已刻未刻其後楊至堂河帥爲刻毛鄭詩釋以下至禮記釋注名曰六藝堂詩禮七編繼刻禹貢二種集釋增多二卷繼刻粹言二種此目外刻者有尙書餘論一卷毛詩陸疏校正二卷孝經集注一卷北宋汴學篆隸二體石經記一卷三百九十一紙紙八行行十字亦可謂富矣而瞠目不答索之不予豈都門未攜一帙無以應恣伯之求耶然則論未爲過也

### 漢後隋前

趙益甫有漢後隋前有此人小印人間所出予按宋史藝文志別史有李匡文漢後隋前瞬貫圖一卷趙似本之未敢問也

前後輩

詞館最重前後輩禮以一切儀式皆

欽定詞林典故所載非相沿陋習也同省前輩率於大拜前投  
啟求面以爲日後相見免失禮也予自壬申移疾歸田迄今壬  
辰凡十科微特同省諸公不知誰何卽同郡及山會人亦尠投  
啟者予頗不以爲非一則鄉居僻陋舟楫往還彼此不便一則  
應門無僕並李童山之閤人亦烏有且衣冠了烏芙蓉蘿帶不  
堪褻侍貴人偶然晉接顛倒敝笥反以爲苦也而友人閒有以  
此見詢者予記水南灌安遺藁卷謹齋先生讌集詩跋有云予  
在翰林二十有二年去之又四年所見聞於前後輩者日異竊  
謂後輩中容有不見重於前輩而因以不重夫前輩亦由前輩  
中無其可重又不重夫後輩而因以不見重於後輩而此不重

前輩之後輩不旋踵又自爲後輩所不見重之前輩則何若各  
自重以交相重者之爲得乎友人大笑而去予入翰林今已十  
有五科去之已三十年所見所聞較之旭莊前輩時更大異自  
問實無可重因以不見重夫後輩方自愧引匿之不暇至於此  
不重前輩之後輩不旋踵又自爲後輩所不見重之前輩則長  
江後浪推前浪錢文敏有慨息不置何足爲之屑屑計較乎

茶館客話卷三翰林前輩稱後輩曰館丈必四科以前之前  
輩或有師生之誼者則可否則無是稱近見翰林一經散館  
授職與新庶常作札輒曰館丈醜甚典故則作十三科之大  
前輩退菴隨筆卷四爲後輩者誠宜執弟子禮甚恭而爲  
前輩者亦必求所以無忝爲前輩也